

四庫全書

史部

欽定四庫全書

史部

御定月令輯要卷八

詳校官監察御史_臣查瑩

檢討_臣德生覆勘

總校官知縣_臣繆珙

校對官編修_臣盧遂

謄錄監生_臣張仲芳

欽定四庫全書卷

御定月令輯要卷八

夏令

天道

火王

增易象曰火在天上大有集解荀爽曰

凱風

原詩凱風自南吹彼棘心增傳

三星在隅戶

增詩三星在隅箋心星在隅謂四月之末

月之末六

月之中

御定月令輯要

丙丁

原禮其日丙丁注丙之言炳也日之行夏南從赤道長育萬物月為之佐時萬物皆炳然著見而強

大又因以為日名焉漢書律歷志明炳於丙大盛於丁說文丙位南方萬物成炳然陰氣初起陽氣將虧从一

入門一者陽也丁夏時萬物皆丁實

炎帝祝融

原禮其帝炎帝其神祝融注炎帝大庭氏也祝融顓頊氏之子曰黎為火官增三禮義宗

火正曰祝融者祝甚也融明也言夏時物氣甚明也張聿首夏猶清和詩祝融將御節炎帝啟朱明

夏為假

增禮南方者夏夏之為言假也養之長之假之仁也漢書律歷志夏假也物假大乃宣平釋名

夏假也寬假萬物使生長也

南薰

原禮昔者舜作五絃之琴以歌南風增家語舜造南風之詩其詩曰南風之薰兮可以解吾民之愠

兮南風之時兮可以阜吾民之財兮原唐詩紀事文宗
夏日與諸學士聯句曰人皆苦炎熱我愛夏日長柳公
權續曰薰風自南來殿閣生微涼時五學士屬和帝獨
詠公權兩句令題於壁上增張說詩騎仗聯聯環北極
鳴笳步步
引南薰

朱明

原爾雅夏為朱明注氣赤而光明增漢書禮樂志
朱明盛長勇與萬物桐生茂豫靡有所訕郭璞詩

義和騁丹衡
朱明赫其猛

長羸

原爾雅夏為長羸新論夏之德炎炎不信
則草木不長草木不長則長羸之德廢

夏雨

增爾雅暴雨謂之凍注今江東呼夏月暴雨為凍
雨原陸機纂要夏雨名綿雨增扶南傳金障國入

四月便雨六月
乃止少有晴日

御製喜雨詩十六韻并序

朕撫御天下每以民生為念夙興夜寐無時少懈也歲在丁卯自春涉夏蘊隆少雨日更增甚麥秋期至農事堪憂傳曰龍見而雩謂建巳之月萬物始盛待雨於天今當雨不雨或人事之未修朕躬之有過歟亟命重臣凡國計憂戚刑名錢穀但有關於民者再三講究有言在京臣工鐫級過多皆賜復還可以致雨以及戲館秧歌之細事無不曲盡議論迄於五月憂心如焚減膳撤

樂端居省過將以明詔布告天下思所以挽回天意詔
下旬有餘日或膚雲方集輒阻燥風或微霖纔施旋升
杲日昔人遇災而懼側身修行欲銷去之况茲不雨乎
朕以涼德臨億兆之上為民之誠天日可監欲躬詣郊
壇致祭諸臣亦以為請因命禮官諏吉具儀齋戒肅穆
步禱

帝於始齋之晚密雨濡潤祭之日雷雨交作自茲間日而
雨遍四郊田野霑足朕先憂而飲食俱廢者為民也既

雨之後喜雨而舉手加額者亦為民也今天不遺斯民
禱而賜之雨使得不愧三公九卿之請朕之幸矣故賦
喜雨詩以抒其懷

體國為民事憂勤固在斯驕陽春既盛膏澤夏愆期省
刑書每下請雨令頻施雲未油然作風偏颯爾吹芄芄
苗欲槁細細草將萎翹首瞻青漢焦心對赤墀園扉重
舉滯旃屢幾疇咨齋祭祀神鑒精誠只已知誰云天最
遠於是聽能卑默處敬居日恭虔步禱時微衷慚上格

大化喜潛移霧霈滋南畝飄瀟遍九達
澼澤垂田家還自樂朝野共吟詩從此煩襟滌由來
百志熙願同茲砥礪參贊奉無私

盛陽

增孟子秋陽以暴之注秋陽周之秋夏之五六月盛陽也

日德

原管子南方曰日其時曰夏其氣曰陽陽生火與氣其德施舍修樂其事號令賞賜賦爵受祿順鄉

謹修神祀量功賞賢以動陽氣九暑乃至時雨乃降五穀百果乃登此謂日德日掌賞賞為暑注日以昭育為德也

夏雲

原管子藹然若夏之靜雲乃及人之體鵬然若謫之靜注夏雲之起油然含潤將降其澤及人之體

去除熱氣而和順雖有譎躁之人亦皆恬靜增張衡應
問元龍迎夏則陵雲而奮鱗樂時也宋之問詩野舍時

雨潤山雜
夏雲多

夏為樂

原尸子夏為樂南方為夏夏興也南任也是故萬物莫不任興蕃殖充盈樂之至也

斗柄南指

原鵠冠子斗柄南指天下皆夏增孝經說斗指午為夏

陽長萬物

原古三墳夏長萬物陽之象也

陽主生物

增越絕書陽者主生萬物方夏三月之時大熱不至則萬物不能成

天牢空

增史記天官書赤帝行德天牢為之空索隱謂王者行德以應火精之帝謂舉大禮封諸侯之

地則是赤帝行德夏陽主舒散故天牢為之空則人主
當赦過宥罪者也正義赤帝南方赤燥怒之帝也夏萬

物茂盛功作大典則天施德惠天牢
為之空虛也天牢六星在北斗魁下

熒惑

增漢書天文志熒惑曰南方夏大禮也視也禮虧視失逆夏令傷火氣罰見熒惑

乘離執衡

原漢書魏相傳南方之神炎帝乘離執衡司夏注火為禮禮者齊齊者平故為衡

助夏養

增春秋繁露太陽因火而起助夏之養也

日行南陸

原易稽覽圖夏日月行東南赤道曰南陸增陶潛詩重離照南陸鳴鳥聲相聞

養生百木

原後漢書荀爽傳夫在地為火在天為日在天者用其精在地者用其形夏則火王其精

在天溫暖之氣養生百木是其孝也增韓愈南山詩夏炎百木盛蔭鬱增埋覆

火養母

增白虎通子養父母何法法夏養長木此火養母也

徵聲調

增晉書律歷志火音徵三分宮去一以生其數五十四屬火者以其徵清事之象也夏氣和則

徵聲

調

黃雀風

增風土記五月風發六月乃止俗號黃雀風是時海魚變為黃雀故名

南風鬱蒸

增岳陽風土記岳州北瀕江州郡氣候尤熱夏月南風則鬱蒸特甚蓋湖南千里無山多

得日色故少陰涼之氣也

六氣十八候

增埤雅立夏之節初五日螻蟈鳴次五日蚯蚓出後五日赤箭生次小滿氣初五日

吳葵華次五日靡草死後五日小暑至次仲夏芒種之節初五日螳螂生次五日鵙始鳴後五日反舌無聲次夏至氣初五日鹿角解次五日溫風至次五日蟋蟀居壁後次季夏小暑之節初五日溫風至次五日蟋蟀居壁後

五日鷹乃學習次大暑氣初五日腐草為螢次五日土潤溽暑後五日大雨時行凡此六氣一十八候皆夏氣之令

梅雨

原埤雅江湘二浙四五月間梅欲黃落則水潤土柱礎皆汗蒸鬱成雨謂之梅雨也增瑣碎錄立

夏後逢庚日為入梅芒種後逢辰日為出梅唐太宗詩和風吹綠野梅雨灑芳田杜甫詩思霑道暍黃梅雨敢望宮恩玉井水

點蒼積雪

增名山記點蒼山綿亘百餘里若屏風然有十九峯環列內向陰崖積雪經夏不消故亦

名雪山

舶舩風

原湧幢小品吳中五六月間梅雨既過必有大風連數日土人謂之舶舩風云是舶商請於海

欽定四庫全書

卷八

神得之凡舫遇此風日行數千里雖猛而不為害四明錢塘商至夏中畢集者此風致之也增蘇軾詩三句已過黃梅雨萬里初來舫舫風

政典

福衡

原詩夏而福衡注秋將嘗祭而夏福衡施於牛角以止觸飭其牲言夙戒也

夏苗

增禮歲三田疏夏田為苗擇取不孕任者若治苗去不秀實者原爾雅夏獵為苗注為苗稼除害增

沈約均聖論夏苗取其害穀

夏不田

增禮歲三田注三田者夏不田疏以夏是生養之時故不田公羊公狩于郎注不以夏田者春

秋制也以為飛鳥未去於巢走獸未離於穴恐傷害於幼穉故於苑囿中取之

車旂服物

原禮乘朱路駕赤駟載赤旂衣朱衣服赤玉食菽與雞其器高以麤注菽實孚甲堅合屬

水雞木畜時熱食之亦以安性也麤猶大也器高大者象物盛長

夏宗

增周禮春官大宗伯夏見曰宗注宗尊也欲其尊王疏夏南方六服當宗之歲盡來宗

夏官

增周禮夏官司馬疏象夏所立之官馬者武也言為武者也夏整齊萬物天子立司馬共掌邦政政

可以平諸侯正天下故曰統六師平邦國唐書百官志光宅二年改兵部曰夏官

祭先牧

增周禮夏官校人夏祭先牧注先牧始養馬者疏祭之者夏草茂求肥充也

頒馬攻特

原周禮夏官校人頒馬攻特注夏通淫之後攻其特為其蹄鬻不可乘用鄭司農云攻特

謂驂之

房馬

原周禮夏官圉師夏房馬注
房廡也廡所以庇馬涼也

禁原蠶

原周禮馬質禁原蠶注原再也天文辰為馬蠶
書蠶為龍精龍馬同氣禁蠶以息馬也埤雅再

蠶謂之原蠶一名魏蠶今以晚蠶養之
先王之法禁馬俗謂之夏蠶亦曰熱蠶

夏儲

增國語魯宣公夏濫於泗淵里革斷其罟而棄之
曰古者鳥獸孕水蟲成獸虞於是乎禁罝羅措魚

鼈以為夏槁助生阜也注措措也槁乾也
夏不得取故於此時撝刺魚鼈以為夏儲

禁網罟

原逸周書禹之禁夏三月川
澤不入網罟成魚鼈之長

夏五政

原管子夏三月以丙丁之日發五政一政曰求
有功發勞力者而舉之二政曰開久墳發故屋

辟故窳以假貸三政曰令禁扇去笠毋扱免除急漏田
廬四政曰求有德賜布施於民者而賞之五政曰令禁

置設禽獸毋殺飛鳥五
政苟時夏雨乃至也

火行

御增管子睹丙子火行御天子出令命行人內御
令掘溝澮津舊塗發藏任君賜賞君子修游馳

以發地氣出皮幣命行人修春秋之禮於天下諸侯通
天下遇者兼和然則天無疾風草木發奮鬱氣息民不
疾而榮華蕃七
十二日而畢

祝融為司徒

增管子祝融辨乎南方故使為司徒
夏者司徒也注謂主徒衆使務農也

賞五德

增管子夏賞五德滿爵祿遷官位禮孝弟復賢
力所以勸功也注五德謂五常之德賢而有功

當復除之
此皆夏令

夏禁

增管子夏無遏水達名川塞大谷動土功射鳥
獸注凡此夏之禁又夏政不禁則五穀不成

欽定四庫全書

卷八

審治刑賞

增管子乘夏方長審治刑賞必明經紀陳義設法斷事以理虛氣平心乃去怒喜

謹守泉布

增管子大夏帷蓋衣幕之奉不給謹守泉布之謝物且為之舉

兵尚戟

增管子兵尚戟象夏物之森聳

七舉時節

增管子七舉時節君服赤色味苦味聽羽聲治陽氣用七數飲於赤后之井以毛獸之火

數七火氣舉君則順時節而布政

旱不舉火

增漢書昭帝紀始元六年夏旱大雩不得舉火注不得舉火抑陽助陰也

叔粟當賦

增漢書昭帝紀元鳳六年夏詔曰夫穀賤傷農今三輔太常穀減賤其令以叔粟當今年

賦

司馬司夏

增大功修四衛強股肱質射御才武聰慧治衆

長卒所以為儀綴於國出可以為率誘於軍
旅四方諸侯之遊士國中賢餘秀與閱焉

成夏事

增大戴禮方夏三月養長秀蕃庶物於時有
事享於皇考爵士之有慶者七人以成夏事

火夏長

增春秋繁露火者夏成長本朝也舉賢良進茂
才官得其能任得其力賞有功封有德出貨財

振困乏正封疆使四方恩及於火則火順人而甘
露降恩及羽蟲則飛鳥大為黃鵠出見鳳凰翔

哲主夏

增春秋繁露王者能知則知善惡知善惡則夏
氣得故哲者主夏夏陽氣始盛萬物兆長王者

不掩明則道不退塞而夏至之後大暑隆萬物茂育懷
任王者恐明不知賢不肖分明白黑於時寒為賊故王
者輔以賞賜之事然後
夏草木不霜火炎上也

大神司令

原淮南子南方之極自北戶孫之外貫顓頊之國南至委火炎風之野赤帝祝融之所司

者萬二千里其令曰爵有德賞有功惠賢良救飢渴舉力農賑貧窮惠孤寡憂罷疾出大祿行大賞起毀宗立

無後封建侯立賢
輔注祝融火神

減省匠作

增後漢書鍾離意傳永平二年夏旱而大起北宮意上疏帝策詔報曰湯引六事咎在一

人比上天降旱密雲數會朕戚然慙懼思獲嘉應故分
布禱請闕候風雲北祈明堂南設雩場今又敕大匠止

作諸宮減省不急詔因謝
公卿百僚遂應時澍雨焉

請雨

增後漢書諒輔傳仕郡為五官掾時夏大旱太守
自出祈禱山川連日而無所降輔乃自暴庭中慷慨

慨呪曰輔為股肱不能進諫納忠和調陰陽承順天意
至令天地否隔萬物焦苦咎盡在輔今敢自祈請若至

日中不雨乞以身塞無狀於是積薪柴聚茭茆以自環
據火其旁將自焚焉未及日中時而天雲晦合須臾澍
雨一郡沾潤又戴封傳為西華令蝗不入界大旱禱
請無獲乃積薪坐其上以自焚火起而大雨暴至

鑑盛冰

增宋書禮志夏祠用鑑盛冰室一鑑以禦溫
氣蠅蚋三御殿及太官膳羞竝以鑑供冰

榜門受餉

增南史何思澄傳父敬叔齊長城令有能名
在縣清廉不受禮遺夏節至忽榜門受餉數

日中得米二千餘斛他物
稱是悉以代貧人輸租

夏卿

增隋書百官志天監七年加置太府卿以少
府為少府卿加置太僕卿三卿是為夏卿

導洛通汴

增宋史河渠志元豐間四月導洛
通汴六月放水四時行流不絕

薦新

增元史祭祀志薦新冰羔羊孟夏用之櫻桃竹筍
蒲筍羊仲夏用之瓜豚大麥飯小麥麵季夏用之

民用

夏畦

增孟子病於夏畦疏其勞苦有甚於夏之五六月而灌園也

夏生惡暑

增荀子蠶賦夏生而惡暑喜濕而惡雨蝻以為母蛾以為父注生長於夏先暑而化

心通夏氣

原內經心者生之本神之變也其華在面其充在血脉為陽中之太陽通於夏氣

養長

原內經夏三月此謂蕃秀天地氣交萬物華實夜臥早起無厭於日使志無怒使華英成秀使氣得

泄若所愛在外此夏氣之應養長之道也逆之則傷心

夏脉如鈞

增內經黃帝曰夏脉如鈞何如而鈞岐伯曰夏脉者心也南方火也萬物之所以盛長也

故其來盛去衰故曰鈞

種黍菽

增尚書大傳主夏者火火昏中可以種黍菽齊民要術崔氏曰四月蠶入簇時雨降可種黍禾

謂之上時夏至先後各二日可種黍蟲食李者黍貴也又夏種黍稌與植穀同時非夏者大率以耨赤為候諺

曰耨釐釐種黍時

徵屬夏

增史記樂書註徵屬夏夏時生長萬物皆成形體事亦有體故配事絃用五十四絲

支暑熱

增淮南子貧人夏則被褐帶索含菽飲水以支暑熱

盧橘熟

增司馬相如上林賦盧橘夏熟註郭璞曰今蜀中有給客橙似橘而非若柚而芬香即盧橘也

吳錄朱光為建安太守有橘冬月於樹上覆裹之至明年春夏色變青味絕美上林賦云盧橘夏熟盧黑色也

蓋近是乎

苗麥田

增四月民月令五月
六月可苗麥田

夏梨

增廣志洛陽北芒山有張公夏梨甚甘海
內唯有一樹潘岳閒居賦張公大谷之梨

瞑菜

原南方草木狀綽菜夏生於池沼間葉類茨菰
根如藕條南海人食之云令人思睡呼為瞑菜

抱香履

原南方草木狀抱香履抱木生水松之旁若寄
生然極柔弱不勝刀鋸乘濕剝而為履既乾而

韌不可理也履雖猥大而輕者若通脫木
風至隨飄而動夏月納之可禦蒸濕之氣

羅浮橘

增廣州記羅浮山有橘夏熟實
大如李剝皮嗽則酢合食極甘

種小豆

增齊民要術小豆夏至後十日種者為上時初
伏斷手為中時中伏斷手為下時中伏以後則

晚矣

鋤耘

增齊民要術魏文侯曰民夏以鋤耘

夏種淺

增齊民要術凡夏種欲淺直置自生注夏氣熱而生速也

種麻

增齊民要術凡種麻欲得良田不用故墟地薄者糞之耕不厭熟田欲歲易夏至前十日為上時至

日為中時至後十日為下時崔寔曰夏至先後各五日可種牡麻注牡麻有花無實

種藍

增齊民要術崔寔曰榆莢落時可種藍五月可刈藍六月種冬藍

鉸羝羊

增齊民要術羝羊四月末五月初鉸之注性不耐寒早鉸寒則凍死

雞鳴酒

增齊民要術作夏雞鳴酒法秫米二升糞作糜麴二斤擣合米和令調以水五斗漬之封頭今

日作明旦雞鳴便熟

作酢

增齊民要術崔氏曰四月可作酢五月五日亦可作酢

作魚鮓

增齊民要術作夏月魚鮓法醬一斗鹽一升八合精米三升炊作飯酒二合橘皮薑半合菜莢

二十顆仰著器中多少以此為率

鮮菜

增唐本草鮮菜所在有之生水旁葉似澤瀉而小花青白色亦堪蒸啖江南人用蒸魚食甚美五六

月采莖暴乾用

養肺氣

原千金方夏七十二日宜省苦增辛以養肺氣

海鮓

增杜寶拾遺錄隋大業六年吳郡獻海鮓乾鮓其法五六月取大鮓四五尺者鱗細而紫無細

骨不腥取肉切晒極乾以新瓶盛之泥封固用時以布裹水浸少頃去水則皎白如新也

太清氈

增清異錄臨川上饒之民創作醒骨紗用純絲蕉骨相兼撚織夏月衣之輕涼適體陳鳳閣喬

始以為外衫號太清氈又為四襖肉衫子呼小太清

升麻

增開寶本草升麻四月五月著花似粟穗白色六月以後結實黑色根如蒿根紫色黑色多鬚

楊梅

增開寶本草楊梅樹若荔枝樹子生青熟紅肉在核上無皮殼四月五月采之南人醃藏為果寄至

北方

薏珠子

增圖經本草薏苡生真定平澤及田野所在有之苗莖高三四尺葉如黍開紅白花五月六月

結實青白色形如珠子而稍長故呼薏珠子小兒多以線穿如貫珠為戲

櫟皮飲

增圖經本草櫟樹山中處處有皮似檀槐葉如櫟櫟削取裏皮去上甲煎服之夏日作飲去熱

蘭草

增圖經本草蘭草氣香澤可作膏塗髮生澤畔葉光潤五月六月採陰乾婦人和油澤頭經驗方蘭

草江南人家種之夏月采置髮中令頭不腫名省頭草

荔枝

增圖經本草荔枝以閩中為第一蜀州次之嶺南為下其子喜雙實殼有皺紋如羅初青漸紅肉色

淡白如肪玉味甘而多汁夏至六月盛熟時彼方皆燕會可食也大樹下子至百斛五六月盛熟時彼方皆燕會

其下以賞之極量取啖雖多亦不傷人少過則飲蜜漿便解北戶錄南方果之美者有荔枝梧州火山者夏初

先熟而味少劣其高潘州者最佳五六月方熟有無核類雞卵大者其肪瑩白不減水晶性熱液甘乃奇實也

川芎

增圖經本草川芎關陝川蜀江東山中多有之而蜀川者為勝四五月生葉似水芹江東蜀人采

飲葉作

貫衆

增易簡方夏月疫氣時行用貫衆置水缸內一家食之不染

蒲槌花

增政和本草蒲黃生河東池澤至夏抽梗於叢葉中花抱梗端如武士棒杵故俚俗謂之蒲槌

花中藥屑細若金粉市廛間亦採以蜜搜作果食貨賣甚益小兒

菰菜

增政和本草菰根生水中葉似蔗莢久則根盤厚夏月生菌細堪噉名菰菜三年以上心中生臺如

藕白軟中有黑脉堪噉名菰首也

夏陰在內

增蠱海集夏之日離用事陰在內喜嗜冷物益其陰也

花山純

增吳地記花山在吳縣西三十里其山翦鬱幽邃山上有池旱亦不涸中有純甚美夏食之去

熱吳中以為佳品

青梁米

增爾雅翼青梁穀穗有毛粒青米亦微青而細於黃白米夏月食之極為清涼

史君子

增桂海花志史君子花蔓生作架植之夏開一簇一二十葩輕盈似海棠

槐葉淘

增山家清供杜甫詩云青青高槐葉采掇付中厨新麵來近市汁滓宛相俱入鼎資過熟加餐

愁欲無其法於夏米槐葉之秀者湯少淪研細濾清和麵作淘乃以醯醬熟蒸簇細苗以盤行之取其碧鮮可愛也

夏梅

增山家清供用竹刀取欲開梅藥上蘸以蠟投尊缶中夏月以熱湯就盞泡之花即綻香可愛也

木馬

增夢溪筆談信安滄景之間多蚊蚋夏月牛馬皆以泥塗之不爾多為蚊蚋所斃郊行不敢乘馬馬

為蚊蚋所毒則狂逸不可制行人以獨輪小車馬鞍蒙之以乘謂之木馬挽車者皆衣韋袴

造神麴

增水雲錄造神麴五月五日或六月六日或三伏日用白麵百斤青蒿自然汁三升赤小豆末

杏仁泥各三升蒼耳自然汁野蓼自然汁各三升以配白虎青龍朱雀元武勾陳騰蛇六神用汁和麵豆杏仁

作餅麻葉或楮葉包暑如造醬黃法待生黃衣晒收之

指甲花

增本草綱目指甲花有黃白二色夏月開香似木犀可染指甲過於鳳仙花

藕絲菜

增本草綱目蓮藕以蓮子種者生遲藕芽種者最易發其芽穿泥成白藕即莖也長者至丈餘

五六月嫩時沒水取之可作蔬茹俗呼藕絲菜

飯豆

增本草綱目飯豆小豆之白者也大如菜豆而長四五月種之苗葉似赤小豆而畧大可食

硃砂根

增本草綱目硃砂根生深山中苗高尺許葉似冬青葉背甚赤夏月長茂根大如筋赤色氣味

苦涼無毒治咽喉腫痺
磨水或醋嚥之甚良

巢菜

增四川志巢菜葉似槐而小其子如小豆夏時種以糞田其苗可食

菴青

增農桑通訣夏曰菴青注夏日草茂時開墾荒地謂之菴青

飲食宜忌

原養生論夏氣熱宜食菽以寒之不可一於熱又夏忌大醉清晨用炒葱頭酒一二盃暢

血氣金匱要畧夏忌食諸禽獸心犯我靈臺宜食苦蕒以益之

椰子實

增海槎餘錄椰子樹初栽時用鹽一二斗先置根下則易發其俗家之周遭必植之木幹最長

至斗大方結實摘食時在五六月之交去外皮則殼實圓而黑潤肉至白水至清且甜飲之可祛暑氣今行商

懸帶椰瓢
是其殼也

種山禾

增海槎餘錄僭耳境山百倍於田土多石少雖絕頂亦可耕植黎俗四五月必集衆斫山木從

火燒盡成灰不但根幹無遺上下尺餘亦且熟透徐徐鋤轉種旱稻曰山禾米粒大而香可食連收三四熟

石櫟

增杜甫上後園山脚詩朱夏熱所嬰清旭步北林小園背高岡挽葛上崎嶇望延駐目飄飆散疎襟勿謂地無疆劣於山有陰石櫟徧天下水陸蕪浮沉唐韻櫟音原木名皮可食

物候

夏翟

原書羽畎夏翟增禽經五采備曰翟亦曰夏翟注雉尾至夏則光鮮也

倉庚

增詩倉庚于飛熠燿其羽埤雅倉庚鳴於仲春其羽之鮮明在夏

旨苕

增詩苕有旨苕疏苕苕饒也幽州人謂之翹饒夏生莖如勞豆而細葉似蒺藜而青其莖葉綠色可

生食如小
豆藿也

蜉蝣

增詩蜉蝣之羽疏蜉蝣通謂之渠略似甲蟲有角大如指長三四寸甲下有翅能飛夏月陰雨時地

中出王褒聖主得賢
臣頌蜉蝣出以陰

羞右鰭

原禮羞濡魚者夏右鰭集說夏陽在上凡陽氣所在之處肥美右之者便於食也

夏扈趣耘

原爾雅夏扈竊元趣民耘苗者也

霜鹵

增內經土凝霜鹵注夏火炎亢故土上凝白鹹鹵狀如霜也

夏蟲疑冰

原莊子夏蟲不可以語於冰者篤於時也增孫綽遊天台山賦晒夏蟲之疑冰整輕翻而

思矯雍裕之夏冰詠金錯銀盤貯賜冰清光如
聳玉山棱無論塵客閑停扇直到消時不見蠅

石湖冰解

增神異經北方荒中有石湖方千里岸深五丈餘恒冰惟夏至左右五六十日解耳

蘋桐

原南方草木狀蘋桐花嶺南處處有自初夏生至秋蓋草也如桐其花連枝萼皆深紅之極者

鶴草

增南方草木狀鶴草蔓生其花麴塵色淺紫蒂葉如柳而短當夏開花形如飛鶴背翅尾足無所不

備

麟鳴養綏

增宋書符瑞志麒麟夏鳴曰養綏

石雁飛翔

增南康記覆笥山平湖中有石鴈浮在水每至炎氣代序則飛翔若知感候

江蘼

增名醫別錄蘼蕪一名江蘼芎藭苗也生雍州川澤及冤句四月五月采葉暴乾

慈竹

增酉陽雜俎慈竹夏月經雨滴汁下地生蓐似鹿角色白食之已痢也

鵲停放入籠

增酉陽雜俎鵲五月上旬
停放六月上旬拔毛入籠

食膠蟲

增酉陽雜俎食膠蟲夏月食松膠
前脚傳之後脚聶之納之尻中

三白草

增酉陽雜俎三白草此草初生不白入夏葉端
方白農人候之蒔田三葉白苗畢秀矣其葉似

薯蕷

蚊母鳥

增國史補江東有蚊母鳥亦謂之吐蚊鳥夏則
夜鳴吐蚊於叢葦間湖州尤甚嶺表錄異蚊母

鳥形如鷁嘴大而長池塘捕魚而食每叫一聲
則有蚊蚋飛出其口俗云採其翎為扇可辟蚊

仙蟲社

增清異錄唐世京城遊手夏月採蟬貨之唱曰
只賣青林樂婦妾小兒爭買以籠懸牕戶間亦

有驗其聲長短為勝
負者謂之仙蟲社

木蓮花

增益部方物畧記木蓮花生峨眉山中諸谷狀若芙蓉香亦類之木幹花夏開枝條茂蔚不為

園圓
所詩

鬱金香

增政和本草鬱金香為百草之英花如紅藍四月五月採花即香也

青蒿

增政和本草蒿葉似茵陳而背不白蒿四尺許四月五月採苗日乾北人呼為青蒿

夏槐

增圖經本草槐有數種葉大而黑者名櫟槐晝合夜開者名守宮槐葉細而青綠者但謂之槐四月

五月開花六月結實韓愈詩泥雨城東路夏槐作雲屯趙師民詩麥天晨氣潤槐夏午陰清

夏月行船

增夢溪筆談江湖間惟畏大風冬月風作有漸船行可以為備惟盛夏風起於顧盼間往

往羅難曾聞江國賈人有一術可免此患大凡夏月風景須作於午後欲行船者五鼓初起視星月明潔四際

至地皆無雲氣便可行至於已
時即止如此無復與暴風遇矣

茵桂

增爾雅翼茵桂生交趾桂林正圓如竹有二三重
者葉似柿花白藥黃四月開五月結實離騷雜申

椒與茵桂矯茵
桂以紉蕙是也

螳螂捕蟬

增爾雅翼螳螂尤工捕蟬五六月蟬得美蔭
奮翼而鳴螳螂超枝緣條執翳自蔽竦腰舉

刃搏而
取之

小金鈴

增菊譜小金鈴一名夏菊花如
金鈴而極小無大本夏中開

佛頂菊

增菊譜夏月佛頂菊
五六月開色微紅

茉莉花

增桂海花志茉莉花以漸米漿日溉之則作
花不絕可耐一夏花亦大且多葉倍常花

金龜子

增北戶錄金龜子甲蟲也五六月生於草蔓上大於榆莢細視之真金貼龜子行則成雙其蟲

死金色隨滅如螢光也

含笑花

增捫蝨新話含笑花有大小小小含笑香尤酷烈有四時花惟夏中最盛

糠鳩

增本草綱目鳩有白鳩綠鳩今夏月出一種糠鳩微帶紅色小而成羣好食桑甚及半夏苗

旋覆花

增本草綱目旋覆一名盜庚庚者金也謂其夏開黃花盜竊金氣也

薔薇

增本草綱目薔薇野生林塹間四五月開花四出人家栽玩者莖粗葉大延長數大花亦厚大有白

黃紅紫數色最大者名佛見笑小者名木香皆香艷可人高駢夏日詩綠樹陰濃夏日長樓臺倒影入池塘水

晶簾動微風起滿架薔薇一院香

石液

增清涼山志東臺頂古
有怪石夏流液夜有光

占驗

愆候

增管子夏行春政風行冬政落重則雨雹行秋
政水淮南子夏行春令風行秋令燕行冬令格

夏之德暑

增呂氏春秋夏之德暑暑不信
其土不肥土不肥則長遂不精

辰星色

增史記天官書辰星之色夏赤白
而歲熟夏不見有六十日之旱

雲如車蓋

原易飛候有雲大如車蓋土
餘此陽火之氣必暑有暘者

夏雪霜

原易通卦驗乾得坎之蹇則當夏雨雪
春秋感精符王者政令苛則夏下霜

使星向益

增後漢書李郃傳郃通五經善河洛風星縣
名署幕門候吏和帝即位分遣使者皆微服

單行各至州縣觀採風謠使者二人當到益部投郤候
舍時夏夕露坐郤因仰觀問曰二君發京師時寧知朝
廷遣二使耶二人曰不聞也問何以知之郤
指星示云有二使星向益州分野故知之耳

天牛蟲

增酉陽雜俎天牛蟲黑甲蟲也長
安夏中此蟲或出於籬壁間必雨

木再花

增酉陽雜俎木
再花夏有電

水檀

增本草拾遺檀似秦皮其葉堪為飲樹體細堪作
斧柯至夏有不生者忽然葉開當有大水農人候

之以占水旱
號為水檀

杞花

增田家五行杞花
夏月開結主水

星密

增田家雜占夏
夜見星密主熱

欽定四庫全書

御定月令輯要

蘆葦枯

增田家雜占蘆葦之屬叢生於地夏月暴熱之日忽自枯死主有水

魚散子

增田家雜占凡鯉鯽魚在四五月間得暴漲必散子散不盡水未止盛散水必定

雜紀

叩羽絃

原列子當夏而叩羽絃以召黃鍾霜雪交下川池暴涸

桃夏宮

原越絕書今太守舍者春申君所造後壁屋以為桃夏宮玉海越有逃夏宮

芝生殿防

增史記孝武紀元封二年夏有芝生殿防內中乃下詔曰甘泉防生芝九莖赦天下母有

復作

無蚊疇

增謝承後漢書黃昌夏多蚊貧無疇備倩為作

清涼殿

增三輔黃圖清涼殿夏居之則清涼也西都賦清涼宣溫注未央宮有清涼殿

詣水澡灑

增魏志管寧傳居宅離水七八十步夏時詣水中澡灑手足闕於園圃

柳下鍛

增晉書嵇康傳康性絕巧而好鍛宅中有一柳樹甚茂乃激水園之每夏月居其下以鍛

囊螢

增晉書車胤傳家貧不常得油夏月則練囊盛數十螢火以照書以夜繼日焉

朱陽赤殿

增晉書張駿傳謙光殿南曰朱陽赤殿夏三月居之

高卧北牕

增晉書隱逸傳陶潛嘗言夏月虛閑高卧北牕之下清風颭至自謂羲皇上人

不驅蚊

增晉書藝術傳吳猛少有孝行夏日常手不驅蚊懼其去已而噬親也

大夏門

增丹陽記漢夏門魏加曰大夏洛陽記大夏門魏明帝所造有三層高百尺

連陰

增陸機纂要
夏樹名連陰

居窟室

增神仙傳孫登夏
則居窟室披草裳

服雲母

增抱朴子雲母五色其多
赤者名雲珠宜以夏服之

電母琴

增古琴疏帝俊有琴曰電母
每夏月電光一照則絃自鳴

野蠶繭

增宋書符瑞志吳孫權黃
龍三年夏野蠶繭大如卵

書帟

增宋書羊欣傳欣父不疑為烏程令欣時年十二
王獻之為吳興太守甚知愛之獻之嘗夏月入縣

欣著新絹帟晝寢獻之書帟數
幅而去欣本工書因此彌善

雷震石枕

原異苑晉滕放太元初夏枕文石枕卧忽暴
雨雷震其枕枕四解傍人莫不怖懼而放獨

自若云微覺有聲不足為驚

嗽熱湯麵

增世說何平叔美姿儀面至白魏文帝疑其傳粉正夏月與熱湯麵既嗽大汗出以朱衣

自試色轉皎然

青溪小舫

增世說周鎮罷臨川郡還都未及上住泊青溪渚王丞相往看之時夏月暴雨卒至舫至

狹小而又大漏殆無復坐處王曰胡威之清何以過此即啓用為吳興郡

料事小簡

增世說丞相嘗夏月至石頭看庾公庾公正料事丞相云暑可小簡之庾公曰公之遺事

天下亦未以為允

瞿塘夏水

原水經注峽中有瞿塘黃龕二灘夏水迴復所忌唐國史補峽路峻急故曰朝發白

帝暮徹江陵四月五月為尤險時故曰灩澦大如馬瞿塘不可下灩澦大如牛瞿塘不可留灩澦大如襍瞿塘

觸

避毒徒縣

增水經注鬱水逕高要縣縣東去郡五百里刺史夏避毒徒縣水居也

橘洲

增荊州記橘洲在郡南四里夏水懷山諸洲皆沒橘洲獨在

設瓜果

增齊書竟陵王子良傳子良傾意賓客天下才學皆遊集焉善立勝事夏月客至為設瓜果飲及

甘果

老駝知風

原後周書鄧善傳西北有流沙數百里夏日有熱風為行旅之患風之欲至惟老駝知之

即鳴而聚立理其口鼻於沙中人每以為候亦即將纒擁蔽鼻口

板牀坐誦

增北史魏收傳收年十五隨父赴邊好習騎射欲以武藝自達榮陽鄭伯調之曰魏郎弄

戲多少收慚遂折節讀書夏月坐板牀隨樹陰誦積年牀板為之銳減而精力不輟以文華顯

涼風堂

增洛陽伽藍記建中寺余朱世隆所立也有一涼風堂本避暑之處淒涼常冷經夏無蠅有萬

年千歲之樹

白耳龍

增佛國記白耳龍與衆僧作檀越令國內豐熟雨澤以時每至夏龍輒化形作一小蛇兩耳邊

白衆僧識之

襌毒氣

增隋書南蠻傳真臘國每五六月中毒氣流行即以白豬白牛白羊於城西門外祠之

月桂子

原僧伽記江東諸處每至四五月於衢路得月桂子大如狸豆破之辛香相傳是月中所下也

師子尾拂

增酉陽雜俎集賢校理張希復言舊有師子尾拂夏月蠅蚋不敢集其上

蛇醫致雨

增酉陽雜俎王彥威在汴州夏旱時袁王傅季玘寓汴因宴王以早為言季醉曰欲雨甚

易耳可求蛇醫四頭十石甕二枚每甕實以水浮二蛇醫以木蓋蜜泥之分置於閒處甕前後設席燒香選小兒十歲以下十餘令執小青竹晝夜更擊其甕不得少輟王如言試之一日兩夜雨大注舊說龍與蛇師為親家焉

玉精盃

增酉陽雜俎馬侍中嘗寶一玉精盃夏蠅不近盛水經月不腐不耗或目痛含之立愈

功曹嶼

增酉陽雜俎譙郡有功曹嶼天統中濟南來府君出除譙郡時功曹清河崔公恕弱冠有令德

於時夏旱送別者千餘人至此嶼上衆渴思水升直萬錢矣來公有思水色怨獨見一青鳥于嶼中乍飛乍止

怪而就焉鳥起見一石方五六寸以鞭撥之清泉湧出
因盛以銀瓶瓶滿水立竭惟來公與恕供療而已議者
以為盛德所感致焉
時人異之故以為目

雨後得珠

增西陽雜俎蜀石笋街夏中大雨後往往得
雜色小珠俗謂地當海眼莫知其故蜀僧惠

巖曰前史說蜀少城飾以金璧珠翠桓溫惡其太侈焚
之合在此今拾得小珠時有孔者得非是乎杜甫石筍
行雨來往往得瑟瑟
此事恍惚難明論

蠻江蛇

增西陽雜俎南安蠻江蛇至五六月有巨蛇
泛江岸首如張帽萬萬蛇隨之入越王城

飯化蜘蛛

增西陽雜俎以盆覆寒食飯於
暗室地上入夏悉化為蜘蛛

含玉魚

原開天遺事太真素有肉體夏苦
熱常肺渴日含玉魚涼液沃肺

欽定四庫全書

和月令集卷八

水仙鮫綃

原北夢瑣言乾符初張建章為幽州司馬往渤海遇仙女於島遺一鮫綃歸進明宗夏月

展之滿

室凜然

曲江賞夏

增劇談錄曲江池南有紫雲樓芙蓉苑西有杏園慈恩寺煙水明媚入夏菰蒲蔥翠柳陰

四合碧波紅蕖湛然可愛好事者賞芳辰翫清景聯騎攜觴疊疊不絕

室開七井

原雲仙雜記霍仙別墅在龍門一室之中開七井皆以雕鏤木盤覆之夏月坐其上七井

生涼不知暑氣

夏月冰雪

原雲仙雜記長安冰雪至夏月則價等金壁白少傅詩名動於閭閻每需冰雪論筐取之

不復償價

日日如是

雪香扇

增清異錄孟昶夏月水調龍腦末塗白扇上用以揮風外有效者名雪香扇

夏清侯

增清異錄宜春王從謙擬下邳侯草華體作夏清侯傳云侯姓干氏諱秀字聳之渭川人也秀

生而操持凜然不日間昂霄聳壑姿態猗猗久之材堅可用時秦王病暑席溫為下常侍不稱旨有言秀甚忠能碎身為王得之必如意王亟召使者駕追鋒車旁午於道既至引對王大悅詔柄臣金開剖剖析其材刮削其麓編度令合又教其方直縝密於是風采一變賜姓名為平瑩封夏清侯實食嶰谷三百戶自此槐殿虛敞玉牕邃深瑩專奉起居往往以身藉瑩如超熱海登廣寒宮王謂左右瑩每近吾則四體生風神志增爽雖古清卿清郎何以尚茲

司風令史

增太平御覽宋明帝猜慮體肥憎風夏月常著小皮衣拜左右二人為司風令史風起方

欽定四庫全書

卷八

向輒先
啓聞

鹿食菖蒲

增政和本草南山多鹿每一雄遊北百數至春羸瘦及夏唯食菖蒲一味却肥

徵爪事

增揮塵前錄宣和中蔡居安提舉秘書省夏日會館職於道山食爪居安令坐上徵爪事各疏

所憶每一條食一片坐客不敢盡言居安所徵為優欲畢校書郎董彥遠連徵數事皆所未聞悉有據依咸歎服之

捕蟬寓令

原石林燕語宋守約為殿帥夏日輪軍校十數輩捕蟬不使得聞聲有鳴於前者皆重笞

之人多不堪神宗一日問之守約曰軍中以號令為先臣承平總兵殿陛無所信其號令故寓以捕蟬庶幾可使人也

長夏門

增玉海西宮城南三門中曰長夏

啓夏門

增玉海後魏有啓夏門

採星盆

增叙開錄稽昌蓄採星盆夏月漬果則倍冷

大耐糕

增山家清供向杭雪分兌夏日命飲作大耐糕用芋生者去皮剗心以白梅甘草湯焯用蜜和

松子攪仁填之入小甑蒸熟取先公大耐官職之意

觀雲悟筆

增宣和書譜懷素晚精意於翰墨追倣不輟禿筆成塚一夕觀夏雲隨風頓悟筆意自謂

得草書

三昧

羶膏塗髮

增南荒錄新州男子婦人皆縝髮如雲每沐以灰投水中遂就水而沐之以羶膏塗其髮

五六月杭秫未穫時民饑盡髡取髮鬻於市既髡即復以羶膏塗之至來年五六月又可鬻矣

方枕

原齊東野語荆公嗜睡夏月常用方枕或問何意公云睡氣蒸枕熱則轉一方冷處

夏巴納

增遼史營衛志夏巴納無常所多在圖爾山道宗每歲先幸黑山拜陵賞金蓮乃幸子河避暑

黑山上有池池中有金蓮子河在圖爾山東北三百里懷州西山有清涼殿亦為行幸避暑之所四月中旬起牙帳卜吉地為納涼所五月初六月上旬至居五旬與北南臣僚議國事暇日遊獵七月中旬乃去

冰紈扇

增瑯嬛記沈休文雨後齋中獨坐風開竹扉有一女子攜絡絲具入門便坐風飄細雨如絲女

隨風引絡絡繹不斷斷時亦就口續之若真絲焉燭未及跋得數兩起贈沈曰此謂冰絲贈君造以為冰紈忽不見沈後織成紈鮮潔明淨不異於冰製扇當夏日甫攜在手不搖而自涼

咏蟬

增瑯嬛記虞伯施少學於顧野王野王當夏日聞蟬聲使咏之伯施操筆便成詩曰垂綏飲清露流

響出疎桐居高聲自遠非是藉秋風野王喜曰此子沉靜寡欲當享大名於天下

渚宮池亭

增楚小志渚宮即楚頃襄王之離宮而宋玉之故宅也相傳城西南某衛尉別業尚是五

代高從誨池亭故地夏時藕花菱葉清連碧漪彷彿南朝餘艷

寒谿

增武昌記樊山東有小谿夏時懷袖恒有寒氣故謂之寒谿

鞭魃鬼

增五雜俎燕齊之地四五月間嘗苦不雨土人謂有魃鬼在地中必掘出鞭而焚之

取冰奉母

增續文獻通考湯霖新建人母病熱思冰時天煥霖累日號泣池上忽聞池中戛戛聲視

之乃冰也取以奉母遂愈

曬書畫

增芸窓類記凡收藏書畫於未梅雨前曬極燥
頓匣櫃中厚以紙糊門及小縫令不通風即不

微

蟲蟻移徙

增神僧傳釋法順夏中引衆驪山栖靜地多
蟲蟻無因種菜順恐有損害就地祝之令蟲

移徙不久往視如
其分齊恰無蟲焉

勾漏洞天

增西事珥勾漏洞天四面石山圍繞中開平
野數里洞在地上不煩登涉外微敞豁中有

暗溪穿貫而入與北流水合結小杼坐其上命篙師詰
曲而行水無底兩岸石如虎豹孫獫狁行約里許仰見一
大星炯然細視乃石孔透天光也洞對高厓上夏時望
見荷葉田田然峻絕不可到土人云或見荷花則歲大
稔

瀘水

增益州記瀘水源出曲羅兩峰有殺氣暑月舊不行故武侯以夏渡為艱

洗衣

增物類相感志夏月衣蒸以冬瓜汁浸洗其跡自去本草拾遺清水揉梅葉洗蕉葛衣經夏不脆本

草綱目夏衣生微點
梅葉煎湯洗之即去

夏駕山

增名勝志蕭山縣西翠嶂山一名夏駕山夏駕者以夏時水漲此山若駕於湖中也

樓兒井

增名勝志樓兒井在唐州城內西南隈水極清甘夏月久貯不變

大方湖

增名勝志大方湖在剡城縣西南十五里方廣百畝夏月蓮花盛開香聞數里

萬年冰

增清涼山志中臺亦名翠巖峰其靈迹一曰萬年冰臺東麓有冰數丈夏不消

玉花池

增清涼山志中臺靈迹曰玉花池臺東南麓昔有五百梵僧於此過夏白蓮生池堅瑩如玉

聖水寺石窟

增燕山紀遊聖水寺下臨澗泉閣後一松直而多蔭松後石窟夏月陰涼坐久毛髮

豎盡

心用事

增雲笈七籤治心當用呵呵為瀉吸為補夫心者離之氣火之精其色赤其象如蓮花其神如

朱雀心主神化為玉女身長八寸持玉英出入於心府夫心者夏之用事常以四月五月六月弦朔清旦南面端坐叩金梁九漱元泉三靜思想吸離宮之赤氣入口三吞之以補呵之損植其靈府開心穴餌離火濯玉女神平體安

御製夏日同三王

慈寧宮請

太皇太后安詩九天旭日照銅龍朝罷從容侍 上宮花萼

聯翩方晝永晨昏常與問安同

御製夏日潭柘寺詩微雲綴岡嶺細路揚前旌磴轉松門

開漸覺沙界平潭湮石甃露柘古苔紋生一徑得踈豁
層軒面崢嶸愛此戶外泉俯視涓涓清修篁挺蒼翠其
下流交橫斐然淇澳思宛爾渭濱情嶰谷有遺響簫韶
鸞鳳聲

御製夏日瀛臺許奏事諸臣網魚携歸詩西苑頗幽邃崇

臺俯畿甸鮮雲陰修廊南薰披廣殿水木既周遭卉物
亦葱蒨嵐光翠欲流林暉清可薦於茲滌煩暑敢曰恣
遊行眺遠暢陽和居高協靈輿朝來覽封事灑灑意忘
倦高閣晝漏移彤墀集羣彥靖共往汝諧勤劬答予眷
姑為池籞遊從容任所便投綸錦鬣飛舉手纖鱗見委
蛇退食心庶幾娛式燕

御製夏日同大學士明珠暨諸侍衛過黑龍潭途中作詩
駿馬駸駸蹋綠蘋羽旗豹尾映龍鱗暑中荷鍤方知苦

停輦觀苗問稼人

御製夏日水雲榭聞梵聲詩水榭周遮積翠苔薰風拂處

午雲開忽聽梵誦驚殘夢疑是金繩覺路來

夏節

增曹植艷歌行夏節純和天清涼百木滋植舒榮芳

朱夏

增徐幹詩陶陶朱夏德草木昌且繁杜甫詩我有陰江竹能令朱夏寒

慎夏

增應璩與弟君苗君胄書相見在近故不復為書慎夏自愛

子夜夏歌

增子夜夏歌暑盛靜無風夏雲薄暮起攜手密葉下浮瓜沉朱李

三夏

增子夜歌情知三夏熱今日偏獨甚李顥詩炎光燦南溟溽暑融三夏

夏蟬

增顏延之詩夜蟬當夏急陰蟲先秋聞

夏簟

增謝朓詩珍簟清夏室轉扇動涼颺江淹別賦夏簟清兮晝不暮劉禹錫詩薤葉照人呈夏簟松花

滿盃試新茶

夏蓮

增庾肩吾過建章故臺詩夏蓮猶反植秋窓尚左開

九夏

增王勃序桂幄凝驪照綺羅於九夏釋道潛詩長林拱茂木九夏遺炎曦

長夏

增杜甫詩清江一曲抱村流長夏江村事幽馬祖常詩天氣吹高寒山雨灑長夏

僧夏

增韋應物詩安居同僧夏清夜誦道言孫覲詩閉閣臥讀書一榻過僧夏

夏花

增韋應物夏花明詩夏條綠已密朱萼綴明鮮炎日正午灼灼火俱然翻風適自亂照水復成妍

歸視窓間字
熒煌滿眼前

夏衣

增司空曙詩珠荷薦果香
寒簟玉柄搖風滿夏衣

坐夏

增方干詩坐夏莓苔匝行禪檜柏深
寄坐夏僧詩坐夏日偏長知師在律堂

消夏灣

增皮日休詩太湖有曲處其門為兩崖當中數
十頃別如一天池號為消夏灣此名無所私一

統志消夏灣在吳縣洞庭西山吳王避暑處

徐鉉和御製夏日垂釣詩

增物茂時平日正長翠華停
馭睠方塘文竿乍拂圓荷動

賴尾時翻

素荇香

永夏

增晁補之求志賦慨永夏
之宜養霜變然其萃之

夏山

增郭熙畫譜夏山蒼翠而欲滴趙秉文詩夏山如翠無人畫遠處微茫近處濃

朱子夏日詩

增涼氣集幽樹清陰生廣庭偶茲憇煩燠忽憶郊園行婉婉碧草滋迢遞元蟬鳴官

曹且休暇自

適幽居情

度夏

增宋无詩南峰歸度夏舊業在烟霏

張養浩夏李歸田樂

增北陸展修晷薰風薦微涼麥波浩無津細路如橋梁溪光林樾潤

雨氣桑麻香春聲破幽寂人影來微茫缺垣誰所居紅碧相低昂翁姬老瓦盆兒女前捧觴

御定月令輯要卷八

欽定四庫全書

御定月令輯要卷九

四月令

天道

月卦乾

原易乾元亨利貞周易集解乾為大赤崔憬曰乾四月純陽之卦故取盛陽色為大赤

維夏

原詩四月維夏增傳休奕述夏賦四月維夏運臻正陽

方除

增詩日月方除箋四月為除

方輿

增詩日月方輿箋四月方輿

正月增詩正月繁霜傳正月夏之四月朱傳謂之正月者以純陽用事為正陽之月也原董仲舒雨雹對陽德用事則和氣皆陽建巳之月是也故謂之正陽之月

日在畢原禮孟夏之月日在畢集說畢宿在申實沈之次

中星原禮昏翼中旦婺女中淮南子注翼南方朱鳥之宿婺女一曰須女北方元武之宿

律中中呂原禮律中中呂集說仲呂已律長六寸萬九千六百八十三分寸之萬二千九百七十四

增史記律書仲呂者言萬物盡旅而西行也淮南子仲呂者中亢大也仲呂之數六十五四月

盛德在火原禮先立夏三日太史謂之天子曰某日立夏盛德在火天子乃齋

余月原爾雅四月為余

宣中氣

增國語三閒中呂宣中氣也註四月曰中呂坤上六也陽氣起於中至四月宣散於外純乾用

事陰閉藏於內所以助陽成功也晉書律歷志四月律中中呂亥下生之孟夏氣至則其律應所以宣中氣也

夏始

增管子以春日始至始數四十六日春盡而夏始謝朓夏始和劉孱陵詩威仰弛蒼郊龍曜表皇隰春

色卷遙甸炎光麗近邑

昂見

原夏小正四月昂則見初昏南門正傳南門者星也歲再見一正蓋大正所取法也增唐書歷志立

夏日在井四度昏角中南門右星入角距西五度其左星入角距東六度故曰四月初昏南門正昂則見

短夜

增九章望孟夏之短夜兮晦明之若歲註四月之末陰盡極也

恢台

原九辨收恢台之孟夏兮註恢台長養也補註恢大也台即胎也言夏氣大而育物

招搖指已

原淮南子孟夏之月招搖指已增晉書樂志四月之辰謂為已已者起也物至此時畢盡

而起也

清明風

原淮南子明庶風至四十五日清明風至又清

明風至暑鵲鳴博穀飛電見龍升天

純陽

增董仲舒雨電對自十月以後陽氣始生於地

陰月

原董仲舒雨電對四月陽雖用事而陰不獨存此月純陽疑於無陰故亦謂之陰月

陽氣出

原說文已已也四月陽氣已出陰氣已藏萬物見成文章

陽在上九

增周易集解乾上九亢龍有悔于寶曰陽在上九四月之時也亢過也

三素雲

增雲笈七籤立夏清旦北望有紫青黃雲者是太極上真君三元內宮真人三素雲也存禮密

祝三見雲輦
白日昇仙

御製初夏玉泉山詩二首別館依丹麓疎簾映碧莎泉聲

當檻出花氣入垣多路轉溪橋接舟沿石竇過薰風能
阜物藻景已清和山翠引鳴鑣湖光漾畫橈野雲低隔
寺沙柳暗藏橋百轉黃鸝近雙飛白鷺遙今年農事早
時雨足新苗

御製初夏登樓臨水詩澄潭徹底開心鏡柳絮輕飛近玉

樓處處晴花風拂起鶯啼四月繞芳流

御製途中新夏詩邊草纔青節序更征裘未換入朱明遙

思南陌東阡候正是居人急耦耕

清和原謝靈運詩首夏猶清和芳草亦未歇增謝朓詩
麥候始清和涼雨銷炎燠白居易首夏詩清和四

月初樹木正華滋風清
新葉影鳥戀殘花枝

梅夏增薛道衡梅夏應教詩長廊連紫殿細雨應黃梅
浮雲半空上清吹隔池來集鳳桐花散勝龜蓮葉

開幸逢為善樂
頻降濟時才

梅雨增李嶠四月奉教詩潤浮梅雨夕涼散麥風餘杜
甫梅雨詩南京犀浦道四月熟黃梅湛湛長江去

冥冥細雨來白居易詩九江地卑濕四月天炎燠苦雨初入梅瘴雲稍含毒

早夏

增張說詩庭柳餘春駐宮鶯早夏催

新夏

增韋莊詩纔見早春鶯出谷已驚新夏燕巢梁陸游初夏詩竹樹森疎夏令新

麥夏

增薛季宣詩麥夏西山日脚斜

梁武帝首夏汎天池詩

增薄遊朱明節汎漾天淵池舟楫互容與藻蘋相推移碧沚紅

菡萏白沙青連漪新波拂舊石殘花落故枝葉軟風易出草密路難披

梁簡文帝首夏詩

增冷風雜細雨垂雲助麥涼竹木俱蔥翠花蝶兩飛翔燕泥含復落鸚鵡吟

斂更揚卧石藤為纜山橋樹作梁欲待華池上明月吐清光

唐太宗初夏詩

增一朝春夏改隔夜鳥花遷陰陽深淺
葉曉夕重輕煙弄鶯猶響殿橫絲正網

天珮高蘭影接綬細草文連碧鱗驚棹側
元燕舞簷前何必汾陽處始復有山泉

唐太宗賦得夏首啟節

增北闕三春晚南榮九夏初黃
鶯弄漸變翠林花落餘瀑流還

響谷猿啼自應虛早荷向心卷長楊
就影舒此時歡不極調軫坐相於

劉禹錫初夏曲

增銅壺方促夜斗柄暫南回稍嫌單衣
重初憐北戶開西園花已盡新月為誰

來

白居易首夏詩

增林薄蚊未生池靜蛙未鳴景長天氣
好竟日和且青春禽餘嘒在夏木新陰

成元爾水邊坐
脩然橋上行

陸游夏初詩

增新綠陰中燕子飛數家煙火自相依小

畦花永長泥融幽迳藥苗肥郊居樂事何勝數一醉旗亭又典衣

袁易首夏詩

增穿迳幽篁破嫩苔遶池漲綠潏新醅

節序

禁罝麗設弇鄂

原國語鳥獸成水蟲孕水虞於是乎禁

夏鳥獸已成水蟲懷孕之時禁魚鼈之網設取獸之物也

立夏

原淮南子穀雨加十五日斗指常羊之維則春分

經緯斗指辰東南維為立夏物至此時皆假大也

小滿原淮南子立夏加十五日斗指巳則小滿音比太

盈滿也增嫺真子錄小滿四月中謂麥之氣至此方小滿而未熟也

當陽雲增易通卦驗立夏當

上陽雲增易通卦驗小滿

雀子飛增易通卦驗立夏

樂用笙增樂緯異主

迎夏南郊增後漢書祭祀志立夏之日迎夏於南郊祭

翹之舞隋書禮儀志夏迎赤燁怒者火色燁怒其靈炎至明盛也

迎夏樂

增皇覽逸禮自春分數四十六日則天子迎夏於南堂距邦七里堂高七尺堂階二等赤稅七

乘旗旄尚赤田車載戰號曰助天養唱之以徵舞之以鼓執此迎夏之樂也

實沈之次

增月令章句自畢六度至井十度謂之實沈之次立夏小滿居之晉之分野

不熱方

原抱朴子或問不熱之道荅曰以立夏日服六壬六癸之符或服元冰之丸或服飛霜之散暑

不能侵也幼伯子王仲都衣以重裘暴於夏日周以十鑪身不流汗蓋用此方

蜚蠊生

增雷公藥對立夏之日蜚蠊先生為人參伏苓使主腹中七節保守中和

鮑魚醬

增齊民要術崔寔曰四月立夏後可作鮑魚醬

種生薑

增齊民要術崔寔曰三月清明節後十日封生薑至四月立夏後蠶大食芽生可種之

祀雨師

增隋書禮儀志國城西南八里金光門外為雨師壇祀以立夏後申唐書禮樂志立夏後申日

祀雨師元史祭祀志至元七年大司農請於立夏後申日祭雷雨師於西南郊

祀赤帝

增舊唐書禮儀志立夏祀赤帝於南郊帝神農氏配祝融熒惑三辰七宿從祀

祭岳鎮海瀆

增唐六典立夏之日祭南岳衡山於衡州南瀆江

於益州會稽志隋開皇十四年詔南鎮會稽山就山立祠天寶十載封會稽山為永興公歲一祭以南郊迎氣

日韓愈南海神廟碑天寶中冊尊南海神為廣利王因其故廟易而新之在今廣州治之東南海道八十里扶

胥之口黃木之灣常以立夏氣至命廣州刺史行事祠下事訖驛聞

巽王

增周易集解齊王巽崔憬曰立夏則巽王而萬物絜齊

離孕于巽

增正易心法地二生火離之氣孕於巽木立夏節也

蠶無絲

增物類相感志蠶過小滿則無絲

駐色酒

增元池說林立夏日俗尚啖李時人語曰立夏得食李能令顏色美故是日婦女作李會取李

汁和酒飲之謂之駐色酒

不疰夏

增說林立夏日啖李令不疰夏嘉定縣志立夏之日男女各試葛衣乞隣家麥為飯云解疰夏

疾之

隔轍雨

增退齋雅聞錄河朔人謂立夏雨為隔轍雨

享太一宮

增玉海雍熙元年立夏致享太一宮祠官咸集甘露降祠庭

分龍

增五雜組俗有立夏分龍之說蓋龍於是時始分界而行雨各有區域不能相踰故有咫尺之間而

晴雨頓殊者龍為之也

聖泉

增名勝志六石峯在永豐縣東永平鄉上有六石對峙高峻挿天中有聖泉每歲以立夏七日應期

而至有聲如雷則為年豐之兆過期則旱

立夏茶

增杭州府志立夏有新茶新筍朱櫻青梅等物雜以枝圓棗核諸果鏤刻花草人物極其工巧

各家傳送謂之立夏茶

動三車

增桐鄉縣志四月小滿動油車水車絲車曰小滿動三車

日止洞陽宮

增三道順行經洞陽宮日之上館也立夏之日止於洞陽宮吐金冶之精以灌東井

之中沐浴於晨暉收八
素之風歸廣寒之宮

韋應物立夏日憶京師諸弟詩增改序念芳辰煩襟倦
日永夏木已成陰公門

晝恒靜長風始飄閣疊雲纔吐
嶺坐想離居人還當惜徂景

曰次

初一日

御暑服增舊唐書德宗紀興平元年四月辛丑朔時將
士未給春衣上猶夾服漢中早熟左右請御暑

服上曰將士未易冬衣獨御春衫可乎
俄而貢物繼至先給諸軍而始御之

賜櫻桃原秦中歲時記四月一日內園進櫻桃薦寢廟
訖頒賜各有差增王維敕賜百官櫻桃詩芙蓉

闕下會千官紫禁朱櫻出上闌纔是寢園春薦後非關
御苑鳥銜殘歸鞍競帶青絲籠中使頻傾赤玉盤飽食
不須愁內熱大
官還有蔗漿寒

幸長寧公主莊

增唐詩紀事景龍四年四月一日幸長寧公主莊李又陪幸詩紫禁乘宵動青

門訪水嬉貴遊鱸序集仙女鳳樓期合宴簪
紳滿承恩雨露滋北辰還捧日東館幸逢時

放鼓契

增唐會要金吾衛貞元三年敕四月一日已後五更二點放鼓契四

鏡應太陽

增古鏡記汾陰侯生天下奇士也王度常以師禮事之臨終贈以古鏡大業八年四月一

日太陽虧度時在臺引鏡出鏡亦無色俄而
光彩出日亦漸明比及日復鏡亦精朗如故

天祺節

增宋史禮志天禧初詔以大中祥符元年四月一日天書再降內中功德閣為天禎節尋以仁

宗嫌名改為天祺節

當蝕不見

增夢溪筆談熙寧六年有司上言曰當蝕四月朔上為徹膳避正殿一夕微雨明日不見

日蝕百官入賀是日有皇子之慶蔡子正為樞密副使獻詩一首前四句曰昨夜薰風入舜韶君王未御正衙朝陽輝已得前星助陰沴潛隨夜雨消其叙四月一日避殿皇子慶誕雲陰不見日蝕四句盡之當時無能過之者

方廣寺壁照

增虛谷間抄湘潭界中有寺名方廣每至四月朔日在東壁則照見維揚官府樓堞

居民舍宇物物可數

甘澤同慶

增玉海淳化五年四月朔時雨霑足近臣稱賀上謂宰相膏澤霑霈上天之貺也命以簡

欽定四庫全書

御定月令輯要

九

蜀酒建茶珍果賜近臣詔
曰喜此甘澤與卿同慶

黃雲輪囷

增玉海皇祐二年四月朔幸金明池司天
言雲色黃其形輪囷此聖孝感天之應

水蟲上弩

增廣州記水弩蟲四月一
日上弩射人八月後却弩

狄祠賽會

增昌平山水記州西八里為昌平舊縣今居
民不滿百家而唐狄梁公祠香火特盛歲四

月朔賽會二三百里
內人至者肩摩踵接

張說四月一日過江赴荊州詩

增春色沅湘盡三年客
始回夏雲隨北帆同日

過江來水漫荊門出山平郢路
開比肩羊叔子千載豈無才

白居易和微之四月一日詩

增四月一日天花稀葉陰
薄泥新燕影忙蜜熟蜂聲

樂麥風低冉冉。稻水平。漠漠芳節。或蹉跎遊心。稍牢落。春華信為美。夏景亦未惡。颭浪嫩青荷。重欄晚紅藥。吳宮好風月。越郡多樓閣。兩地誠可憐。其奈久離索。

初二日

雄雉飛集

增唐會要貞觀十六年四月二日有雄雉飛集明德殿前上問褚遂良是何祥也遂良對

曰昔秦文公時有童子化為雉雌者鳴於陳倉雄者鳴於南陽童子言得雌者伯文公遂以為寶雞祠漢光武得雄遂起南陽而有四海陛下舊封秦王故雄雉見於秦地所以彰表明德也上大悅曰立身之道不可無學

雍熙曲宴

增宋史禮志雍熙二年四月二日詔輔臣三司使翰林樞密直學士尚書省四品兩省五

品以上三館學士宴於後苑賞花釣魚張樂賜飲命羣臣賦詩習射賞花曲宴自此始

周伯星見

增王海景德三年司天監言四月二日戊寅夜初更見天星色黃出庫樓車騎官西在氐

三度鄭之分野壽星之次後益潤澤按星經瑞星有四其一曰周伯星色黃煌煌然所見之國大昌又按太乙占

云王者制禮作樂內外得宜君上壽考國祚大昌則周伯星出乞付史館從之

泛震澤

增楊維禎集乙酉四月二日與蔣桂軒伯仲同泛震澤大小雷望洞庭之峯吹笛飲酒乘月而

歸

初三日

置義倉

增唐會要貞觀二年四月三日尚書左丞戴胄上言曰隋開皇之制天下輸粟謂之社倉及大

業中取充官費今請自王公以下計墾田秋熟所在為義倉歲凶以給民太宗善之乃詔畝稅二升粟麥杭稻

隨地所宜寬鄉斂以所種狹鄉據青苗簿而督之耗十
四者免其半耗十七者皆免之商賈無田者以其戶為
九等出粟自五石至五斗為差下戶不取
焉歲不登以賑民或貸為種子至秋而償

鑄九鼎成

增通典天后萬歲通天元年四月
三日鑄九鼎成置於明堂之庭

日旁五色雲

增玉海天聖八年四月三日乙酉幸瓊林
苑賜從官射射於苑亭遂燕從臣是日

旁有五
色雲

觀水嬉

增玉海熙寧三年四月
三日幸金明池觀水嬉

舍利放光

增續高僧傳釋寶巖幽州人仁壽下敕召送
舍利於本州弘業寺四月三日夜放大光明

照天地有
目皆見

茅君歸句曲

增雲笈七籤茅盈字叔申咸陽南關人也漢宣帝時二弟俱貴鄉里相送者數百人

時盈亦在座謂賓曰我來并四月三日當之官能如今日之集會不衆許之至期日衆賓拉集盈與家人及親族辭訣歸句曲人因改句曲為茅君山

孫逖奉和四月三日上陽水窓賜宴詩

增今日逢初夏

和先作雨恩厚別成春鳳吹臨清洛龍輿下紫宸此中歌在藻還見躍潛鱗

初四日

迎釋迦像

增洛陽伽藍記長秋寺中有三層浮圖一所金盤靈刹耀諸城內作六牙白象負釋迦在

虛空中莊嚴佛事悉用金玉四月四日此像常出辟邪師子導引其前吞刀吐火騰驤一面綵幢上索說誦不

常奇伎異服冠於都市
像停之處觀者如堵

勿伐樹木

增酉陽雜俎四月
四日勿伐樹木

瓊林宴射

增玉海至和二年四月四日壬辰幸瓊林苑
宴射上中的者十四已而閱騎士射柳枝

盼一石斛

增玉海紹興二十五年四月四日
製一石斛盼之以草倉庾之弊

五臺慶雲

增聞見後錄唐穆宗元和十五年四月四日
河東節度使裴度奏五臺山佛光寺側慶雲

現若金仙乘狻猊領其
徒千萬自巳至申乃滅

不落夾

增蕪史四月四日進不落夾用葦葉方
包糯米長可四寸濶一寸味與粽同

祀三仁

增續文獻通考三仁廟在衛輝府比干廟在
衛輝府城北俱每歲四月四日有司祭祀

稻熟日

增嘉定縣志四月初四為稻熟日喜晴

文殊生

原佛書四月四日文殊菩薩誕

初五日

唐虞祠宇

增玉海淳熙四年四月五日靜江守張栻言州有唐帝祠去城二十里而近山曰堯山虞

帝祠去城五里而近山曰虞山臣已新祠宇請著祀典從之

初六日

服豸冠

增唐會要乾元二年四月六日敕御史彈事仍服豸冠舊制大事則豸冠衣朱衣纁裳白紗中

單以彈之小事則常服而已

競渡戲

增唐詩紀事景龍四年四月六日幸興慶池觀

幸興慶池戲競渡應制拂露金輿丹旆轉凌晨黼帳碧

池開南山倒影從雲落北澗搖光寫溜迴急槳爭標排

符度輕帆截浦觸荷來橫汾宴

鎬歡無極歌舞年年聖壽杯

天下太平年

增玉海紹興十四年四月六日虔州言水柱內有天下太平年五字詔送史館十五

年作瑞木
成文曲

初七日

昭儀寺像

增洛陽伽藍記昭儀尼寺有一佛二菩薩塑工精絕四月七日常出詣景明景明三像恒

出迎之

欽定四庫全書

御定月令輯要

十三

頒新誠本業記

增唐會要垂拱二年四月七日撰百寮新誠及兆人本業記以頒賜朝集使

餞种放

增玉海祥符二年四月七日种放以集賢院學士歸終南宴餞龍圖閣賜七言詩命學士即席

賦詩作序命杜鎬援引名臣歸山故事杜鎬誦北山移文以規放

天棗熟

增名勝志蕭縣東南二十五里有廟橋橋北一里有天棗樹枝幹蟠屈數百年物正二月之交

開小花結實如酸棗可食四月初七日全樹皆熟初八日遂空

世尊降魔

增法苑珠林四月七日世尊降魔爾時天魔將十八萬天魔衆皆來惱佛佛以眉間微光

照皆墮落

乘豹昇天

增真仙通鑑衡嶽洞門觀在石廩峯西石榴峯南下昔施真人施存自號胡浮先生或云

婉盆子師黃盧子得三皇內文役御虎豹之術遁變化
景之法或隱或顯數百年慕石廩洞門是其冲真之地
乃居之又於峯西石室造閣亘空十餘丈出乘白豹或
步還山豹即迎之以晉惠帝永康元年四月七日乘豹
天昇

初八日

浴佛會

原荆楚歲時記荆楚以四月八日諸寺各設會
香湯浴佛共作龍華會以為彌勒下生之徵也

東京夢華錄四月八日佛生日十大禪院各有浴佛齋
會煎香藥糖水相遺名曰浴佛水乾淳歲時記四月八
為佛誕日諸寺院各有浴佛會僧尼輩競以小盆貯銅
像浸以糖水覆以花棚鏡鉞交迎徃邸第富室以小
杓澆灌以求施利增名勝志長寧縣南金龜山上有波
淪殿邑人於四月八日取嘉魚泉浴佛故名波淪也佛

運統記大慧禪師浴佛上堂語云今朝正是四月八淨飯王宮生悉達吐水九龍天外來捧足七蓮從地發

乞子

增荆楚歲時記四月八日長沙寺閣下有九子母神是日市肆之人無子者供養薄餅以乞子徃徃

驗有

金鏡灌佛

原宋書劉敬宣傳劉敬宣父牢之敬宣八歲喪母晝夜號泣桓序鎮蕪湖牢之參序軍事

四月八日敬宣見衆人灌佛乃下頭上金鏡以為母灌因悲泣不自勝序歎息謂牢之曰卿此兒既為家之孝子必為國之忠臣

請佛

增世說范甯作豫章八日請佛有板衆僧疑或欲作答有小沙彌在坐末曰世尊默然則為許可衆

從其義

夢觀聖主

增梁書海南傳千陀利國在南海洲上天監元年其王瞿曇脩跋陀羅以四月八日夢見

一僧謂之曰中國今有聖主十年之後佛法大興汝若遣使貢奉敬禮則土地豐樂商旅百倍我當與汝往觀之乃於夢中至中國拜觀天子既覺心異之陀羅本工畫乃寫夢中所見高祖容質飾以丹青仍遣使并畫工奉表獻玉盤等物使人既至模寫高祖形以還其國比本畫則符同焉因盛以寶函日加禮敬

佛生日

增南史顧歡傳老子入關之天竺維衛國國王夫人名曰淨妙老子因其晝寢乘日精入淨妙

口中後年四月八日夜半時剖右腋而生墜地即行七步於是佛道興焉魏書釋老志初釋迦於四月八日夜從母右脅而生既生姿相超異者三十二種天降嘉瑞以應之亦三十二法苑珠林菩薩處胎垂滿十月於四月八日初出時夫人見後園中有一大樹名曰無憂華色香鮮枝葉分布即舉右手欲牽摘之菩薩漸漸從

右脇而出

散花

增魏書釋老志世祖即位每引高德沙門與共談論於四月八日興諸佛像行於廣衢帝親御門樓

臨觀散花以致禮敬洛陽伽藍記景明寺宣武皇帝景明年中立至正光中太后始造七級浮圖一所去地百

仞時世好崇福四月七日京師諸像皆來此寺尚書祠曹錄像凡有一千餘軀至八日以次入宣陽門向閭闔

宮前受皇帝散花於時金花映日寶蓋浮雲幡幢若林香煙似霧梵樂法音聒動天地百戲騰驤所在駢比名

僧德衆負錫為羣信徒法侶持花成藪車騎填咽繁衍相傾

遊河間寺

增洛陽伽藍記四月八日京師士女多至河間寺觀其殿廡綺麗無不歎息以為蓬萊仙

室亦不是過入其後園見朱荷出池綠萍浮水飛梁跨樹層閣出雲咸皆唧唧

不殺草木

增齊人月令四月八日不宜殺草木雲笈七籤金書仙誌戒勿以四月八日殺草伐樹

服生衣

增齊人月令四月八日始服生衣白居易詩揭襲偷嘗新熟酒開箱試着舊生衣

愈瘡酒

增齊民要術愈瘡酒法四月八日用一石麴一斤搗作末俱醎水中酒酢煎一石取七斗以

麴四斤湏漿冷醎麴一宿上生白沫起炊秫一石冷醎中三日酒成

剪冬菜

增齊民要術種冬菜法自四月八日以後日日翦賣其翦處尋以手拌斫斷地令其起水澆糞

覆之比及翦徧初者還復周而復始日日無窮

五色香水

原高僧傳靡歌利頭四月八日浴佛以都梁香為青色水鬱金香為赤色水丘隆香為白

色水附子香為黃色水安息香為黑色水以灌佛頂

靈育生

增高僧傳釋元高小名靈育母冠氏夢見胡僧持傘香花滿坐便即懷胎至四月八日生異香

及光明照壁迄旦乃散因名曰靈育

八關涼宮

增唐會要顯慶五年四月八日於東都苑內造八關涼宮

禮萬佛山

原杜陽雜編上崇奉釋氏新羅國獻萬佛山可高一丈雕沉檀珠玉以成之其佛之形大

者或逾寸小者七八分其佛之首有如黍米者有如半菽者其眉目口耳螺髻毫相無不悉具而更鏤金玉水精為幡蓋流蘊菴羅蘆蔔等樹搆百瑤為樓閣臺殿其狀雖微而勢若飛動又前有行道僧徒不啻千數下有紫金鐘徑濶三寸上以龜口銜之每擊其鐘則行道之僧禮首至地其中隱隱謂之梵音蓋關振在乎鐘也其山雖以萬佛為名其數則不可勝紀上因置九光扇於巖巘間四月八日名兩眾僧徒入內道場禮萬佛山是

時觀者數非人工及觀九色光於
殿中咸謂之佛光即九光扇也

指天餡餡

增食譜張手美家四
月八日指天餡餡

西湖放生

增蘇軾乞開西湖狀天禧中王欽若奏以西
湖為放生池禁捕魚鳥為人主祈福自是以

來每歲四月八日郡人數萬會於湖上所活羽毛鱗介
以百萬數皆西北向稽首仰祝千萬歲壽乾淳歲時記
四月八日西湖作放生會舟楫盛
多畧如春時競買龜魚螺蚌放生

開池

增東京夢華錄自三月一日開金明池瓊林苑至
四月八日開池雖大風雨亦有遊人路無虛日

羊桐葉飯

增岳陽風土記岳州四月八日取
羊桐葉浙米為飯以祠神及先祖

周孝侯生

增汎舟錄三月乙丑達宜興四月戊辰朔
乙亥邑中迎社頗盛云周孝侯生日也

富貴坊

原溪蠻叢笑富貴坊競渡預以四月八日下船聚飲江岸舟子各招他客盛列飲饌以相誇大

或獨酌食前方丈群蠻環觀如雲一年盛事名富貴坊

阿禿師

增神僧傳釋阿禿師不居寺舍出入民間語謫必有徵驗齊神武患其漏洩軍務執置并州城

內遣人防守當日城三門各有一禿師盪出遮執不能禁未幾有人從北州來云禿師四月八日於雁門郡市捨命郭下衆以香花送之埋於城外并州人笑之云四月八日禿師從汾橋東出一脚有鞋一脚徒跣但不知入何坊巷人皆見之何云雁門死也此人復往北州報語衆共開塚看之唯見一隻履鞋耳

更定薦物

增玉海景祐二年四月八日已未宗正丞趙良規言月令一歲之間八薦新物周頌潛冬

薦魚春薦鮓是其樂章存者通禮著宗廟薦新凡五十餘品詔禮官議曰本朝惟薦冰著常祀呂紀簡而近薄

唐令雜而不經於是更定四時所薦
凡二十八物卜日薦獻一以開寶禮

烏飯

增本草綱目烏飯乃仙家服食之法今之釋家多
於四月八日造之以供佛陸龜蒙道室書事詩烏

飯新炊芼臠香道
家齋日以為常

放鵲

增西湖志餘宋時杭人四月八日放鵲為太守祈
壽蘇軾懷錢塘詩云去年柳絮飛時節記得金籠

放雪
衣

優鉢羅花

增帝京景物略禮部儀制司有優鉢羅花馬
金蓮花也開必自四月八日至冬而實如鬼

蓮蓬脫去其衣中金
色佛一尊者核也

捨豆結緣

增帝京景物略四月八日捨豆兒曰結緣十
八日亦捨先是拈豆念佛一豆佛號一聲有

念豆至石者至日熟豆人徧捨之其人亦一念佛啖一豆也

戒壇聽戒

增長安客話盧溝橋西北為灰廠出灰廠入山兩壁夾徑徑盡見山門有高閣在山中央

可望渾河閣後有軒度巖上折而右即戒壇壇在殿內甃石為之中有高座為每年說戒之地周圍皆列戒神

四月八日游僧畢集聽戒

選僧祈福

增續文獻通考宋孝宗乾道三年詔上竺若納講師於四月八日選五十僧入內觀堂行

金光明三昧祈福邦家時上於選德殿製觀音讚賜上竺刊於石

祭洞庭廟

增續文獻通考洞庭廟在長沙府岳石山洪武初命有司每歲四月八日致祭

麥餅宴

增燕都游覽志先是四月八日梵寺食烏飯朝廷賜羣臣食不落夾蓋緣元人語也嘉靖十四

年帝以其名不雅馴乃賜
百官於午門食麥餅宴

六花成像

增名勝志觀音山在彭澤縣北一里元至正
元年四月八日雪岩前六花集石壁間現觀

音大士迹因
立佛堂山中

無尾魚

增楚通志湘陰縣東六十里相傳晉時里人劉
倩贅陶淡家四月八日膾魚於橋上方斫魚尾

或報曰汝家舉宅上昇倩棄之今每
歲八日見無尾魚逆水上至橋而退

祭衛源

增輝縣志衛源廟在蘇門山麓百門泉上泉乃
衛河之源廟創於隋以祀泉神稱靈源公每歲

四月八日
郡守致祭

鑄金像

增法苑珠林東晉孝武寧康三年四月八日襄
陽檀溪寺沙門釋道安於郭西精舍鑄造丈八

欽定四庫全書

御定月令輯要
卷九

十九

金銅無量壽佛明年嚴飾成就鎮軍將軍郝恢之創蒞襄部贊擊福門其像夜出西遊萬山遺示一跡印文入石衆咸駭異恢乃改名金像寺至梁普通三年四月八日下敕於建興苑鑄金銅華趺泝流送之以承像足立碑頌德劉孝義文蕭子雲書天下稱最

啓夏齋

增雲笈七籤三洞奉道科
云四月八日為啓夏齋

水文天尊

增雲笈七籤水文天尊者開元七年蜀州新津縣新興尼寺四月八日設大齋聚食之次

有一道流後至就衆中坐衆人輕侮之不與設齋齋畢道流起入佛殿中良久不出人皆異之爭入殿尋求無復蹤跡忽見道流隱形在殿柱中隱隱分明以刀斧削之益加精好其像於殿柱中自然而見

駱賓王四月八日題七級詩

增化城分鳥堞香閣俯龍川
複棟侵黃道重簷架紫

煙銘書非晉代璧畫是梁年霸畧今何在王宮尚歸然
二帝曾遊聖三卿是偶賢因茲遊勝侶超彼託良緣我
出有為界君登非想天悠悠青曠裏蕩蕩
蕩白雲前今日經行處曲承穹蓋煙

楊萬里四月八日嘗新荔枝詩

增一點胭脂蒂旁忽
然紅遍綠衣裳紫瓊骨

骼丁香瘦白雪
肌膚午暑涼

初九日

翠微宮

增唐會要貞觀二十一年四月九日公卿上言
請修太和宮厥地清涼可以清暑詔從之包山

為苑自栽木至設幄九
日畢工因改為翠微宮

乾會節

增宋史度宗紀嘉熙四年四月九日生於紹興
府榮邱景定五年詔以生日為乾會節原三朝

欽定四庫全書

御定四庫全書
卷九

三

野史四月八日謝太后壽崇節九日度宗乾會節賈似道令黃蛻致語中一聯云神母聖子萬壽無疆亦萬壽無疆昨日今朝一佛出世又一佛出世

賜御書扇

增玉海紹興元年四月九日賜侍讀王綯胡直儒侍講胡交修御書扇王綯曰霖雨思賢

佐丹青憶老臣直儒曰文物多師古朝廷半老儒交修曰相門韋氏在經術漢臣湏

賜新茶

增玉海紹興十一年四月九日賜侍讀吳表臣蘇符新茶

初十日

聖姑祠

增述異記河間郡有聖姑祠姑姓郝字女君魏青龍二年四月十日與隣女樵采於澠深二水

處忽有數婦人從水而出至女君前曰東海使聘為婦故遣相迎因敷茵於水上請女君於上坐順流而下其

家奔到岸側女君曰今幸得為水仙願勿
憂憶語訖風起而沒於水鄉人因為立祠

同天節

增宋史神宗紀慶歷八年四月戊寅生於濮王
宮祥光照室羣鼠吐五色氣成雲治平四年以

四月十日
為同天節

十一日

蘇軾四月十一日初食荔枝詩

增海山仙人絳羅襦紅
紗中單白玉膚不須更

待妃子笑風骨
自是傾城姝

十二日

新宮銘

增集異記蔡少霞者幼奉道一日沿溪行忽得
美蔭因就憩焉不覺成寐因為人夢中召去至

城郭處所經歷門堂深邃莫測引至東廊止於石礪之側謂曰召君書此少霞凝神擲管頃刻而畢因記於心題云蒼龍溪新宮銘紫陽真人山元卿撰清寧二百三十一年四月十二日建

十三日

刊秘閣墨跡

增石林燕語續法帖跋云元祐五年四月十三日秘書省以秘閣所藏墨跡未經太

宗朝纂刻者刊於石有旨從之

盼升斗式

增玉海紹興元年四月十三日詔工部以省倉升斗令文思院校定盼其式於諸州

上藥王廟

增北京歲華記四月十三日上藥王廟諸花盛發白石莊三里河高梁橋外皆貴戚花塲

好事者邀賓客游之

張說四月十三日詔宴寧王亭子詩增何許承恩宴山

鶴洲陰穠闢雞道果思夏來茂花嫌
春去早行樂無限時皇情及芳草

十四日

行像

增佛國記法顯到于闐國其國中十四大僧伽藍不數小者從四月一日城裏便掃洒道路莊嚴巷

陌其城門上張大幃幕事事嚴飾王及夫人采女皆住其中瞿摩帝僧是大乘學王所敬禮最先行像像入城時門樓上夫人采女遙散眾花紛紛而下至十四日行像訖王及夫人乃還宮

通義宮高會

增唐會要武德六年四月十四日幸龍潛舊宅改為通義宮置酒高會詔曰爰擇良

辰言導邑里禮同過沛事等歸譙故老咸臻族姻斯會肅恭薦享感慶兼集

乾元節

增宋史仁宗紀仁宗大中祥符三年四月十四日生乾興元年以生日為乾元節元符宮石刻

宋仁宗母李氏夢一羽衣之士跣足從空而下云來為汝子時上未有嗣是夕名幸有娠明年四月十四日生

仁宗幼年每穿履襪即亟令脫去常徒步禁中皆呼為赤腳仙人

呂嵒生

增續文獻通考呂嵒字洞賓蒲州永樂縣人貞元十四年四月十四日巳時生異香滿室天樂

浮空有白鶴飛入帳中忽不見

葛蒲生日

增陶朱公書四月十四葛蒲生日修剪根葉無逾此時宜積梅水漸滋養之則青翠易生

尤堪

清目

呂翁鶴草

增名勝志仙翁鶴草在單縣城東北隅相傳仙翁以四月十四日誕來遊邑人包九成者

於前一日積虔致禱次早果有白鶴四隻從西南來哺時方去自是每仙翁誕期祠側草荊上陡成鶴形日高遂泯至今尚然人傳為呂翁鶴草云

御製經明成祖勒銘處指示扈從諸臣詩

并序

朕率師行四十五日至我哨界界內外高阜坡陁大抵皆黃白沙五色石北行十一里有石瑩然獨出明成祖北伐刻銘其上時則永樂八年庚寅四月十六日朕今過此適在四月十四日山原猶昔時日同符朕謂明成祖之率師而行也與今日異其時出邊皆敵人也今蒙

古悉我効力之人其時皆漢人步卒今我兵悉騎士且
熟習邊外之行由此觀之明成祖深入敵中數千里縱
橫若行無人之境亦誠難矣我軍若不及彼良可愧也
凡聞斯語者當人人自奮焉爰紀其事而繫之以詩

伊昔永樂年征馬嘶朔風磧間銘片石苔蘚磨青銅我
行初拂拭夏節欣相同當時月在巳今值清和中後先
間兩日彼亦一代雄我武討不庭春發明光宮塞草綠
微茁雨雪陰濛濛或言時尚早稍待邊花紅寧知英傑

人所見良疏通迅行掩不備兵法貴折衝軍謀在帷殿
士氣如虎熊豈不資羣策惟斷斯有功作詩紀其事聊
以示臣工

紫微夫人四月十四日作

增朝啓東晨暉飛軒越滄淵
山波振青涯八風扇元煙迴

眇易遷房有懷真感人三金可遊盤東
岑宜永甄紛紛當塗中孰能步生津

十五日

結夏

原荆楚歲時記四月十五日天下僧尼就禪剎掛
搭謂之結夏增曹松詩師言結夏入巴峯雲水迴

頭幾萬重徐寅詩長閑便是
忘機者不出真如結夏僧

結制

原釋苑宗規四月十五僧家結夏天下僧尼此日就禪刹掛搭謂之結制結制即結夏夏乃長養之

節在外行恐傷草木蟲類故九十日安居至七月十五日散去為解夏又謂解制

櫻筍厨

原唐輦下歲時記四月十五日自堂厨至百司厨通謂之櫻筍厨

皮日休和魯望四月十五日道室書事詩

增望朝齋戒是尋常靜啓

金根第幾章竹葉飲為甘露色蓮花鮮作肉芝香松膏背日凝雲磴丹粉經年染石床剩欲與君終此志頑仙惟恐鬢成霜

十六日

頒陰陽書

增唐會要太宗以陰陽書近代訛偽穿鑿拘忌亦多命太常博士呂才及陰陽學者十餘

人共加刊正削其淺俗存其可用者貞觀十五年四月
十六日己酉撰陰陽書凡五十三卷及舊書四十七卷
詔頒行之才為叙質以經史其穿鑿拘忌者才有駁議
曰叙宅經叙祿命叙葬書識者以為確論

豐泉

增魏徵醴泉銘序貞觀六年孟夏皇帝避暑九成
宮四月甲申朔旬有六日上及中宮歷覽臺觀閑

步西城俯察厥土微覺有潤因而以杖導之有泉隨
而涌出乃承以石檻引為一渠其清若鏡味甘如醴

天倉開

原遵生八箋四月十六
日天倉開宜入山修道

十七日

凱旋饗宴

增陳書宣帝紀太建八年四月甲寅詔曰元
戎凱旋羣師振旅旌功策賞宜有饗宴今月

十七日可幸樂遊苑設
絲竹之樂大會文武

欽定四庫全書

欽定月令輯要
卷九

芝草生

增玉海元豐七年四月十七日丙戌景靈宮言芝草六生於天元殿景靈門中壬辰朝獻至天

元殿觀
芝草

十八日

忠烈王誕

增括異志金山忠烈王漢博陸侯姓霍氏吳孫權時一日致疾黃門小豎附語曰國主封

界華亭谷極西南有金山鹹塘湖為民害民將魚鼈食之非人力能防臣漢之功臣霍某也部黨有力能鎮之可立廟於山吳王乃立廟建炎間建行宮於當湖賜名顯應尤著鄉民祈禱輒應王以四月十八誕辰浙之東西商賈舟楫朝獻踵至自入四月至中旬末一市為之鼎沸

碧霞元君誕

增帝京景物畧出左安門東行四十里石橋五尺曰弘仁橋橋東碧霞元君廟歲四

月十八日傳是元君誕辰士女進香鳴金號衆四十里道相屬也

游玉泉

增帝京景物畧四月十八日要戒壇游香山玉泉茶酒棚妓棚周山灣澗曲

祀趙奢

增名勝志趙奢塚在邯鄲縣西山上王喬祠下有玉寶觀歲以四月十八日為祀期

十九日

却生日貢獻

增資治通鑑唐德宗建中元年夏四月癸丑上生日四方貢獻皆不受注上生於天

寶元年四月十九日不置節名

浣花日

增老學庵筆記四月十九日成都謂之浣花遨頭宴於杜子美草堂滄浪亭傾城皆出錦繡夾

道自開歲宴遊至是而止故最盛於他時予客蜀數年屢赴此集未嘗不晴蜀人云雖戴白之老未嘗見浣花

日雨也

佑聖夫人誕

增歲華紀麗譜四月十九日浣花佑聖夫人誕日也太守出窄橋門至梵安寺謁夫

人祠就宴於寺之設廳既宴登舟觀諸軍騎射倡樂導前泝流至百花潭觀水嬉競渡官舫民船乘流上下或幕帶水濱以事遊賞最為出郊之勝

二十日

上諭語解

增玉海紹興七年尹焞給筆札解論語以進八年四月二十日上之

小分龍

原嘉定縣志四月二十日為小分龍

二十一日

交泰殿成

增唐會要天寶十載四月二十一日興慶宮造交泰殿成

葺太學講殿

增王海慶歷四年四月壬子二十一日判監王拱辰田況王洙余靖等言首善當自

京師漢太學二百四十房千八百餘室生徒三萬人唐學舍亦千二百間今取才養士之法盛矣而國子監才

二百楹制度隘小不足以容學者請以錫慶院為太學葺講殿及更衣殿備乘輿臨幸從之

築蠶室

增王海政和元年四月二十一日於壇側度地築公桑蠶室其親蠶殿名曰無數

求遺書

增玉海紹興三年四月二十一日劉岑請詔求四方遺書從之

普賢生

原佛書四月二十一日普賢菩薩誕

二十二日

真草書屏

增唐會要貞觀十四年四月二十二日太宗自為真草書屏風以示羣臣筆力遒勁為一

絕時之

二十三日

齊后山精舍

增南史齊高帝紀益州有山古老相傳曰齊后山昇明三年四月二十三日有沙門

元暢者於此山立精舍其曰上登尊位

甘露降

增唐會要武德九年四月二十三日甘露降於中華殿之桐木泣如冰雪以示羣臣

紫微夫人四月二十三日夜作

增神玉曜靈津七元煥神扉靈邊方寸裏一躍

登太微妙音乘和唱高會亦有機齊比天人眇協彼晨景飛總轡六合外寧有傾與危

二十四日

雨玉璽

原南史齊高帝紀昇明三年四月二十四日榮陽郡人尹千於嵩山東南隅見天雨石墜地石

開有玉璽在其中璽方三寸文曰戊丁之人與道俱肅然入草應天符掃平河洛清魏都又曰皇帝運興千奉

璽詣雍州刺史蕭赤斧赤斧以獻

祭鰓魚

增韓愈鰓魚文維元和十四年四月二十四日潮州刺史韓愈使軍事衙推秦濟以羊一猪一

投惡溪之潭水以與鰓魚食而告之

玉津閱射

增玉海建隆四年四月二十四日丁亥幸玉津園閱諸軍騎射

後圃種麥

增玉海紹興二年四月二十四日上曰朕聞祖宗時禁中有打麥殿今於後圃令人引水

灌畦種之亦欲
知稼穡之艱

二十五日

講武

增唐高宗實錄麟德二年四月二十
五日講武邙山之陽御北城樓觀之

赤龍在案

增唐會要明皇初臨潞州景龍二年四月二
十五日廳事據案假寐白鶴觀道士見赤龍

案在

二十六日

霍山祠廟

增唐會要開元十一年四月二十六
日庚申崇飾霍山祠廟秩視諸侯

觀刈麥

增玉海太平興國三年四月二十六日庚辰駕
幸景風門駐輦觀刈麥移幸玉津園張樂飲羣

酒臣

進易解

增玉海淳熙十二年四月二十六日知潭州林栗進周易經傳集解三十二卷繫辭上下二卷

文言說卦序雜本文共為一卷河圖洛書八卦九疇大衍總會圖六十四卦立成圖大衍揲著解共為一卷總三十六冊詔付秘書省教書獎諭

二十七日

日抱戴

增唐會要明皇初臨潞州景龍元年四月二十七日有抱戴潘炎日抱戴賦景龍元年四月

照於明兩陽光杲耀抱黃道而再中喜氣氤氲戴赤霄而直上

清香館

增彥周詩話先伯父熙寧九年四月二十七日

詩牌題云冀州功德院山東李白其詩曰秋風吹桂子
只在此山中待得春風起還應生桂叢桂叢日以滿清

香何時斷只為愛
清香故號清香館

農桑圖

增松雪齋集延祐五年四月二十七日上御嘉
禧殿集賢大學士臣邦寧大司徒臣源進呈農

桑圖上披覽再三問作詩者何人對曰翰林承旨臣趙
孟頫作圖者何人對曰諸色人匠提舉臣楊叔謙上嘉

賞久之人賜文
綺一段絹一匹

魏夫人降

增真誥興寧四年丙寅四月二十七日夜
晉司徒文康公舒之女魏夫人降楊羲家

梅堯臣四月二十七日與王正仲飲詩

增我來自楚君
自吳相遇汎波

銜舳艫時時舉酒共筵
樂莫問罍盜有與無

二十八日

先蠶黑幣

增玉海大觀四年四月二十八日議禮局言
開元禮享先蠶幣以黑請從黑以合至陰之

義

藥王誕

原佛書四月二十八日藥王誕

二十九日

置黃帝壇

增唐會要天寶九載四月二十九日制曰項
者每祀黃帝乃就南郊禮亦非便宜於皇城

內西南坤地改置黃帝
壇朕當親祀以昭誠敬

御定月令輯要

三十一

赤烏白兔

增玉海至道元年四月二十九日乙巳知通利軍錢昭序表獻部內所產赤烏白兔各一

表云烏栗陽精兔昭陰瑞報火德繁昌之兆示金方桑服之符念茲希世之珍罕有同時而見望宣付史館從之上謂侍臣曰烏色正如渥丹信火德之應也

閱大樂

增玉海天聖九年四月二十九日乙巳上御承明殿閱大樂賜樂工錢帛有差先是太常寺以

景德中嘗窮案大樂其後頗多增製故請臨觀焉

掌秘閣書

增玉海政和八年四月二十九日工部員外郎滕康請秘閣四部書以秘書郎掌之列史

館於左以法東觀從之

三十日

限日

原燕翼貽謀錄民間訴水旱舊無限制欺罔官吏無從覈實太宗淳化二年詔訴水旱夏以四月三

十日為限日

御製見龍行

并序

四月三十日駐蹕金山是日申刻無風雷惟細雨一陣既過而西南見龍橫亘數十丈宛轉移時遂入雲端問及土人非起蛟也名為龍見以為祥瑞等語朕亦不以為異故援筆漫成見龍行以示隨侍

在田在天連二五純陽變化參吞吐非如起蛟壞田廬

又非密霧傷園圃雲端前後發祥光逶迤上下行有矩
而乘六龍以御天不違施德普時雨有亢有悔有虧盈
首出庶物用精明大哉龍德從其類發揮純粹須經營
長江一派何決濟素波萬里盡澄泓象震淩雲敦元氣
日新顧諟玩無聲

政典

明堂左个

原禮孟夏之月天子居明堂左个
註明堂左个大寢南堂東偏也

行爵出祿

原禮命太尉贊傑俊遂賢良舉長大行爵出
祿必當其位集說傑俊以才言賢良以德言

長大以
力言

繼長增高

原禮繼長增高母有壞墮疏是月草木蕃廡

益高大之物謂勸民種殖集說欲其
長則勿壞焉欲其高則勿墮焉可也

始締

原禮是月也天子
始締註初服暑服

勞農

原禮命野虞出行田原為天子勞農勸民毋或失
時增呂氏春秋仲呂之月無聚大眾巡勸農事

命農勉作

原禮命司徒循行縣鄙命農勉作毋休於都
註急趨於農也縣鄙鄉遂之屬主民者也

驅獸

原禮是月也驅獸毋害五穀毋大田獵集說夏獵
曰苗正為驅獸之害禾苗者耳與三時之大獵自

不同

嘗麥

原禮農乃登麥天子乃以彘嘗麥先薦寢廟註麥之新氣尤盛以彘食之散其熱也彘水畜增逸周

書維四年孟夏王初祈禱於宗廟乃嘗麥於太祖

聚百藥

原禮是月也聚畜百藥註蕃廡之時毒氣盛集說供醫事也

獻繭收稅

原禮蠶事畢后妃獻繭乃收繭稅以桑為均貴賤長幼如一以給郊廟之服註后妃獻繭

者內命婦獻繭於后妃收繭稅者收於外命婦外命婦雖就公桑蠶室而蠶其夫亦當有祭服以助祭收其近

郊之稅耳疏十而稅一

飲酎

原禮是月也天子飲酎用禮樂註酎之言醇也謂重釀之酒也春酒至此始成與群臣以禮樂飲之

于朝正尊卑也增左傳晉人徵朝於鄭鄭人使少正公孫僑對曰溴梁之明年公孫夏從寡君以朝于君見于

嘗耐與執燔馬疏月令言飲耐當是夏祭之後此言嘗耐謂見于夏祭故云與執燔馬

禁令

原禮毋起土功毋發大衆毋伐大樹

龍見而雩

原左傳龍見而雩註建巳之月蒼龍宿之體昏見東方萬物始盛待雨而大故祭天遠為

百穀祈膏雨春秋考異郵三時唯有禱禮唯四月龍星見始有常雩

御製夏旱步禱

南郊喜雨詩歷春憫農勞首夏望嘉穀離畢月故遲密雲
去何速顯穹闕膏澤及此祈年夙齋居承穆清中夜起
自肅繁星麗赤霄雲漢光自煜雞鳴開重闔與馬輟華

轂步禱升

郊壇祠官啓太祝是時甘澍零霑潤及拜伏空濛迫閭闔噴薄驅海瀆屏翳灑道迴滲漉足裳服麥隴應秀色重穎欲在目願惟歌屢豐餘粟棲比屋

攻駒

原夏小正執陟攻駒增傳執也者始執駒也執駒也者離之去母也執而升之君也攻駒也者教之

服車數舍之也

官田

原淮南子四月官田註四月勉農事故官田也

郊祀

增漢書郊祀志文帝即位十三年明年黃龍見成紀其夏下詔曰有異物之神見於成紀毋害於民

歲以有年朕幾郊祀上帝諸神禮官議毋諱以朕勞有司皆曰古老天子夏親郊祀上帝于郊故曰郊於是夏四月文帝始幸雍郊見五時祠衣皆上赤又明年夏四月文帝親拜霸渭之會以郊見渭陽五帝五帝廟臨渭其北穿蒲池溝水權火舉而祠若光輝然屬天馬玉海開寶九年幸西京四月庚子有事南郊先是霖雨彌旬及已亥赴齋宮雲物澄霽垂白之民相謂曰不圖今日覩太平天子儀衛

務農蠶

增漢書景帝紀後二年夏四月詔曰雕文刻鏤傷農事者也錦繡纂組害女紅者也農事傷則

饑之本也女紅害則寒之原也夫饑寒並至而能亡為非者寡矣朕親耕后親桑以奉宗廟粢盛祭服為天下先不受獻減太官省繇賦欲天下務農蠶素有畜積以備災害彊毋擾弱衆毋暴寡老者以壽終幼孤得遂長

遂民供養

增漢書武帝紀建元元年夏四月己巳詔曰古之立教鄉里以齒朝廷以爵扶世導民莫

欽定四庫全書

卷九

善于德然則于鄉里先耆艾奉高年古之道也今天下孝子順孫願自錫盡以承其親外迫公事內乏資財是以孝心闕焉朕甚哀之民年九十以上已有受鬻法為復子若孫令得身帥妻妾遂其供養之事

封泰山

增漢書武帝紀元封元年夏四月癸卯上還登封泰山降坐明堂

塞瓠子

增漢書武帝紀元封二年夏四月還祠泰山至瓠子臨決河命從臣將軍以下皆負薪塞河隄

作瓠子之歌

初置刺史

增漢書武帝紀元封五年夏四月初置刺史部十三州

祠神人

增漢書武帝紀太始四年夏四月幸不其祠神人于交門宮若有鄉坐拜者作交門之歌注神

人蓬萊仙人之屬也琅邪縣有交門宮武帝所造

未央宮置酒

增漢書昭帝紀元鳳二年夏四月上自建章宮徙未央宮大置酒賜郎從官帛及宗

室子錢人二十萬吏民獻牛酒者賜帛人一疋

舉文學高第

增漢書宣帝紀本始元年夏四月詔內郡國舉文學高第各一人

舉寃獄

增漢書宣帝紀五鳳四年夏四月遣丞相御史掾二十四人循行天下舉寃獄察擅為苛禁深

刻不改者

存問蒸庶

增漢書元帝紀初元元年夏四月詔曰方田作時朕憂蒸庶之失業臨遣光祿大夫褒等

十二人循行天下存問耆老鰥寡孤獨困乏失職之民

通籍司馬門

增漢書元帝紀初元五年四月詔令從官給事官司馬中者得為大父母父母兄弟

通籍注司馬門者宮之外門也

舉茂材

增漢書元帝紀建昭四年夏四月詔舉茂材特立之士

金匱玉牒

增後漢書祭祀志建武中元元年四月以吉日刻玉牒書函藏金匱壘印封之使太尉奉

匱以告高廟藏于廟室西壁石室高主室之下

舉賢良方正

增後漢書光武紀建武七年夏四月壬午詔公卿司隸州牧舉賢良方正各一人遣

詣公車

班勞策勲

增後漢書光武紀建武十三年四月大饗將士班勞策勲功臣增邑更封凡三百六十五

人

封孔子後

增後漢書光武紀建武十四年夏四月辛巳封孔子後志為褒成侯注平帝封孔均為褒

成侯志均子也古今志曰志時為察令

初祭陳鼎

增後漢書明帝紀永平六年王雒山出寶鼎盧江太守獻之夏四月甲子詔曰祥瑞之降

以應有德方今政化多僻何以致茲易曰鼎象三公豈公卿奉職得其理耶太常其以初祭之日陳鼎于廟以備器用賜三公帛五十匹九卿二千石半之

賜公田

增後漢書明帝紀永平九年四月甲辰詔郡國以公田賜平民各有差

報農功

增後漢書明帝紀永平十年夏四月戊子詔曰昔歲五穀登衍今茲蠶麥善收其大赦天下方

盛夏長養之時蕩滌宿惡以報農功百姓勉務桑稼以備災害吏敬厥職毋令愆墮

巡行河渠

增後漢書明帝紀永平十二年夏四月遣將作謁者王吳修汴渠十三年夏四月汴渠成

辛巳行幸

滎陽巡行河渠乙酉詔曰自汴渠決敗六十餘歲今既築隄理渠絕水立門河汴分流復其舊迹陶

邱之北漸就壤墳故薦嘉玉潔牲以禮河神東過洛汭歎禹之績今五土之宜反其正色濱渠下田賦與貧人

無令豪右得回其利

省冰紈縠絮

增後漢書章帝紀建初二年夏四月癸巳詔齊相省冰紈方空縠吹綸絮

禘祭

增後漢書張純傳禘祭以夏四月夏者陽氣在上陰氣在下故正尊卑之義也

五經課試

增魏志文帝紀黃初五年夏四月立太學制五經課試之法置春秋穀梁博士

夕牲臨拜

增晉書禮志武帝泰始七年四月帝將親祠車駕夕牲而儀注還不拜詔問其故博士奏

歷代相承如此帝曰非致敬宗廟之禮也於是實拜而還遂以為制夕牲必躬臨拜

石畫成文

增晉書武帝紀泰始三年四月戊午張掖太守焦勝上言氐池縣大柳谷口有元石一所

白畫成文實大晉之休祥圖之以獻詔以制幣告于太廟藏之天府

增太學生

增晉書孝武帝紀太元九年夏四月己卯增置太學生百人

祀畢親戎

增魏書禮志神廡二年帝將征蠕蠕省郊祀儀四月以小駕祭天神畢帝遂親戎大捷而

還歸格于祖禩徧告羣神

幸皇宗學

增魏書孝文帝紀太和十六年四月甲寅幸皇宗學親問博士經義

親祀孔廟

增魏書孝文帝紀太和十九年四月庚申行幸魯城親祠孔子廟辛酉詔拜孔氏四人顏

欽定四庫全書

卷九

氏二人為官又詔選諸孔宗子一人封崇聖侯邑一百戶以奉孔子之祀又詔兗州為孔子起園柏修飾墳壠

更建碑銘
褒揚聖德

賜延年杖

增周書于謹傳保定三年四月詔以謹為三老賜延年杖

頒符

增隋書文帝紀開皇七年四月癸亥頒青龍符於東方總管刺史西方以騶虞南方以朱雀北方以

元武

力錢樣

增隋書食貨志大象三年四月詔四面諸關各付百錢為樣從關外來勘樣相似然後得過樣

不同者即壞
以為銅入官

祠華山

增唐書高祖紀武德三年四月丙申祠華山壬寅至自華陰

顏曾贈官

增唐書高宗紀總章元年四月乙卯
贈顏回太子少師曾參太子少保

御九成宮

增唐會要乾封三年四月將作大匠閻立德
造九成宮新殿成移仗御之謂侍臣曰朕性

不宜熱所司頻奏請造此殿既作之後深懼人勞今暑
熱朕在屋下尚有流汗匠人暴露事亦可憫所以不令
精妙意者祇避炎暑耳長孫無忌曰聖心
每以恤民為念天德如此臣等不勝幸甚

始置節度

增唐會要景雲二年四月賀拔延嗣除涼
州都督充河西節度自此始有節度之號

含元殿試

增唐會要開元九年四月甲戌
上親策試應制舉人於含元殿

上封事

增唐會要乾元元年四月詔京官九品以上
封事通典唐乾元二年四月兩省諫官十日一

上封事直論得失無假文
言冀成殿最用存沮勸

貢新瓜

增唐會要太和四年四月有司貢新瓜獻興慶宮

建終南祠宇

增唐會要開成二年四月辛酉建終南山祠宇

進科目記

增唐會要大中十年四月侍郎知舉鄭顥進諸家科目記十三卷敕付翰林自今放榜後

寫及第姓名及所試詩賦題進入每歲編次

十祭

增唐會要四月十祭自祀赤帝至雩祀園邱

日本朝獻

增唐宣宗實錄大中七年四月日本國遣王子來朝獻寶器音樂帝曰近者黃河清今又

日本來朝朕德薄何以堪之因賜百寮宴陳百戲以禮之

訴冤陳牒

增通典開元二年四月敕在京有訴冤者並於尚書省陳牒所司為理若稽延致有屈滯

者委左右丞及御史臺訪察聞奏

乏月

增四時纂要四月也是謂乏月冬穀既盡夏麥未登宜振乏絕救饑窮九族不能自活者救之

置律學

增宋史神宗紀熙寧六年四月乙亥置律學玉海以朝集院為律學賜錢萬五千緡以養生徒

教授四員使學而後從政

舉經明行修

增宋史哲宗紀元祐元年四月詔遇科舉令升朝官各舉經明行修之士一人俟登

第日與升甲

訪求歷書星學

增宋史高宗紀紹興十年四月丙午訪求亡逸歷書及精於星歷者

舉廉吏

增宋史高宗紀紹興十年四月癸亥命部使者歲舉廉吏一人

欽定四庫全書

御定月令輯要

孝義旌門

增宋史理宗紀淳祐十一年夏四月戊戌潭州民林符三世孝行一門義居詔旌表其門

渾天儀象銘

增宋史律歷志元祐七年四月詔尚書左丞蘇頌撰渾天儀象銘

幸金明池

增宋史禮志太平興國九年四月幸金明池習水戰帝御水殿召近臣觀之謂宰相曰水

戰南方之事也今其地已定不復施用時習之示不忘戰耳因幸講武臺閱諸軍都試軍中之絕技者遞加賜

賚遂登瓊林苑樓陳百戲擲金錢令樂人爭之極歡而罷

天津橋圖

增宋史河渠志洛水貫西京多暴漲漂壞橋梁建隆二年留守向拱重修天津橋成甃巨

石為脚高數丈銳其前以疏水勢石縱縫以鐵鼓絡之其制甚固四月具圖來上降詔褒美

置謗木肺石函

增資治通鑑梁天監元年夏四月癸酉詔公車府謗木肺石旁各置一函若肉

食莫言欲有橫議投謗木函若有功勞才器寃沉莫達者投肺木函

設參政

增燕翼貳以防察之問陶穀太祖皇帝以趙普專權欲置副

以參知政事參知機務對乾德二年四月乙丑乃以薛居正呂餘慶為參知政事不押班不知印不升政事堂其後至道元年四月更制令升政事堂知印押班一同宰相

右文修撰

增燕翼貽謀錄政和六年四月奉御筆集賢殿舊無此名秘書省殿以右文殿為名可改

為右文殿修撰

上會要

增麟臺故事天聖末國史成始于修史院續纂會要明道二年命參知政事宋綬看詳修纂至

慶曆四年四月監修國史章得象上新修國朝會要一百五十卷

欽定四庫全書

御定月令輯要

四十一

孟氏講義

增真德秀跋紹興己丑之孟夏盱江包敏道過子粵山之麓縣尹宋侯聞其名延致庠校

發揮孟氏要旨是日邑官洎學子會於堂上者凡百數十人聞君講說莫不聳動歎未嘗有學長吳千兕等將

以君講義刻于學俾書其後

薦冰

增玉海建隆二年始置藏冰務而修其祭常以四月命官率太祝用幣以黑牡祭元冥之神乃開冰

以薦寢廟金史禮志天德二年命有司議薦新禮依典禮合用時物令太常卿行禮四月薦冰

賜飛白

增玉海淳化元年四月辛亥上親草書飛白書紅綾扇賜宰相樞密使翰林學士尚書丞郎兩

省給舍以上各一

賜御書中庸

增玉海天聖五年四月辛卯賜進士王堯臣等聞喜宴于瓊林苑中使賜御詩又人

賜御書中庸篇各一
軸自後遂以為常

罷貢物

增玉海治平四年四月壬申神宗出諸州貢物名件自漳州山薑花至同州楹梓凡四十三州

七十種手詔曰四方入貢雖云古禮考之禹制未有若茲之繁今一郡歲有三四而至者自今其悉罷之

圖上職方

增玉海元祐三年四月己卯詔諸路及州各具圖開析建立沿革城壁吏員戶口貢賦山

川地里
上職方

給官牛

增金史太宗紀天會九年四月詔新徙戍邊戶之耕牛者給以官牛別委官勸督田作

區種法

增金史孟鑄傳泰和四年自春至夏諸郡少雨鑄奏今歲愆陽已近五月比至得雨恐失播種

之期可依種麻菜法擇地形稍下處撥畦種穀穿土作井隨宜灌溉上從其言區種法自此始

祭遁甲神

增北平古今記元英宗延祐七年四月祭遁甲神于香山

蠶禁

增西吳枝乘吳興以四月為蠶月家家閉戶官府勾攝徵收及里閭往來慶弔皆罷不行謂之蠶禁

民用

卷耳

增詩采采卷耳疏卷耳葉青白色似胡荽白華細莖蔓生可煮為茹滑而少味四月中生子如婦人

耳中瑞今或謂之耳瑞幽州人謂之爵耳是也

竹筍

增詩維筍及蒲疏筍竹萌也皆四月生筍譜渭川筍史記曰渭川千畝竹其人與千戶侯等筍晚四

月方盛又慈竹筍四月生江南人多以灰煮食之

獲大麥

原呂氏春秋孟夏之昔殺三葉而獲大麥注昔終也三葉薺亭歷薺莫也是月之季枯死大麥

熟而可獲大
麥旋麥也

種大小豆

增四民月令四月時雨降可種
大小豆美田欲稀薄田欲稠

棗糲

增四民月令四月可
以作棗糲以待賓客

指星麥

原拾遺記張華為九醞酒以三薇漬麴蘖蘖出
西羌麴出北胡胡中有指星麥四月火星出麥

熟而獲之蘖用水漬麥三夕而生萌芽以平旦雞
鳴時而用之俗人呼為雞鳴麥以之釀酒醇美

種黍

增汜勝之書黍者暑也種必待暑先夏至三十日
此時有雨疆土可種黍一畝三升黍心未生雨灌

其心心傷無實黍心初生畏天露令
兩人對持長索繫去其露日出乃止

攝生

增攝生月令四月為乾生氣卯死氣酉是月也萬
物已成天地化生勿冒極熱勿大汗後當風勿暴

露星宿勿食大蒜勿含生蘊勿食雞肉勿食蛇鰾是月
肝藏少氣不行火氣漸臨水氣漸衰稍補腎助肺調和
胃氣無失其時是月八日不遠行
宜安心靜念沐浴齋戒必得福履

羊腎粥

原千金月令四月節內宜食羊腎粥其法先以
兔絲子一兩研煮取汁濾淨和麴煮將羊腎一

具切條葱炒作臠食
之補腎療眼暗赤腫

山檳榔

增竺法真登羅浮山疏山檳榔一名蒟子幹似
蔗葉類柞一叢千餘幹幹生十房房底數百子

四月採

作酢

增齊民要術崔寔
曰四月可作酢

具機杼

增齊民要術四月繭既入簇
趨綵割線具機杼敬經絡

收菜子

增齊民要術崔寔曰四月收蕪菁及芥葶蔞冬
葵子原農政全書四月收諸色菜子斫倒就地

晒打收之用瓶罐
盛貯標記名號

檮酒

增齊民要術作檮酒法四月取檮葉合花株之還
即急抑著甕中六七日悉使烏熟曝之煮三四沸

去滓內甕中下麴炊五斗米日中可燥手一兩抑之一
宿復炊五斗米飯之使熟皮日休寄魯望詩明朝有物

充鄉信檮酒
三瓶寄夜航

雉尾萹

增齊民要術食膾魚萹莢莢之菜萹為第一
四月萹生莖而未葉名作雉尾萹第一作肥莢

越瓜胡瓜

增齊民要術種越瓜
胡瓜法四月中種之

種椒

增齊民要術熟時收取黑子四月
初畦種之治畦下水如種葵法

欽定四庫全書

卷九

鋤葱

增齊民要術種葱四月始鋤鋤遍乃剪剪與地平剪欲旦起避熱時

光明絲

原埤雅廣要橫州之地楓始生葉有蟲食之其形似蠶四月間熟亦如蠶之將絲州人擘取其

絲光明如琴絃

桑椹酒

原四時月令四月宜飲桑椹酒能理百種風熱其法用椹汁三斗重湯煮至一斗半入白蜜二

合酥油一兩生姜一合煮令得所瓶收每服一合和酒飲之

落雁木

增圖經本草落雁木雅州出者苗作蔓纏繞大木苗葉形色大都似茶無花實彼人四月采苗

入藥用

芥心草

增圖經本草芥心草生淄州引蔓白色根黃色四月采苗葉搗末治瘡疥甚效

白鮮

增圖經本草白鮮苗高尺餘莖青葉稍白如槐亦似萊萁四月開花淡紫色似小蜀葵花根似小蔓

菁皮黃白而心實山人採嫩苗為菜茹

石耆

增名醫別錄石耆味甘無毒主欬逆氣生石間色赤如鐵脂四月采

白頭翁

增名醫別錄白頭翁生高山山谷及野田四月采蜀本草白頭翁所在有之有細毛不滑澤花

藥黃四月采實日乾

伏翼

增吳氏本草伏翼或生人家屋間立夏後陰乾治目冥令人夜夜有光

枸杞湯沐浴

原遵生八牋四月初四日七日八日九日取枸杞煎湯沐浴令人不老肌膚光澤

天道西行

原遵生八牋四月盛德在火天行道西行作事出行宜向西吉

石首魚

增田九成遊覽志石首魚每歲四月來自海洋綿亘數里其聲如雷海人以竹筒探水底聞其

聲乃下網截流取之澄以淡水皆圍圍無力初水來者甚佳二水三水來者魚漸小而味漸減矣

苧米

增爾雅翼苧米可為飯生水田中苗似小麥而小四月熟久食不饑

楊桐草

增茶譜湘人四月采楊桐草搗汁浸米蒸作飯食必采石楠芽為茶飲乃去風也

風落胡桃

增衛生易簡方眼目昏暗四月內取風落小胡桃每日午時食飽以無根水吞下偃臥覺

鼻孔中有泥腥氣為度

傍林鮮

原山家清供夏初竹笋盛時就竹邊煨熟其味甚鮮名曰傍林鮮文與可守洋州正與家人煨

笋午飯忽得東坡書詩云想見清貧饒太守渭濱千畝在胸中不覺噴飯滿案想作此供也

夏枯草

增本草綱目夏枯草葉似旋覆三月四月開花作穗紫白色似丹參花結子亦作穗五月便枯

四月采之

石麪

增本草綱目石麪不常生亦瑞物也宋真宗祥符五年四月慈州民饑鄉寧縣山生石脂如麪可作

餅餌

蠟樹

增本草綱目今人不知女貞但呼為蠟樹立夏前後取蠟蟲之種子裹置枝上半月其蟲化出延緣

枝上造成白蠟
民間大獲其利

勒魚

增本草綱目勒魚出東南海中以四月至漁人設網候之聽水中有聲則魚至矣有一次二次三次

乃止狀如鰐魚小首細鱗腹下有硬刺如鰐腹之刺頭上有骨合之如鶴喙形乾者謂之勒蝨

欽定四庫全書

卷九

時魚

增食源本草鮒魚初夏時有餘月則無故名本草網目按孫愐云鮒出江東今江中皆有而江東獨

盛故應天府以充御貢每四月鮒魚出後即出云從海中沂上人甚珍之陶朱公書鮒魚盛於四月鮮白如銀

其味甘美廣州謂之三鰲魚

榆錢糕

增帝京景物畧四月榆初錢麪和糖蒸食之曰榆錢糕

防霧傷麥

原農政全書四月防有霧傷麥但有沙霧用蘇麻散拴長繩上侵晨令兩人對持其繩于

麥上牽拽抹去沙霧則不生蟲

梅豆

增農政全書種大豆鋤成行壟春穴下種早者二月種四月可食名曰梅豆

正屋漏

增田家曆四月正屋漏以脩暴雨

種蓮

增種樹書種蓮先以羊糞壤地於
立夏前兩三日種當年便著花

栽蒲

增農桑通訣四月揀綿蒲肥旺者廣帶
根泥移出于水池內栽之次年即堪用

種黑豆

增陶朱公書黑豆北方高原之所皆產喂馬極
肥故名馬料豆人食之補腎明目何首烏賴其

蒸晒更有功效
四月間撒種

趙孟頫四月耕詩

增孟夏土加潤苗生無近遠漫漫冒
淺陂茫茫被長坂嘉穀雖已殖惡草

亦滋蔓君子與小人竝處必為患
朝朝荷耒耜往薅薅忘疲倦旦隨鳥雀起歸與牛羊晚有婦念將饑過午可無
飯一飽不易得
念此獨長嘆

趙孟頫四月織詩

增四月夏氣清蠶大已屬眠高者何
昂昂蛾眉復娟娟不憂桑葉少遍野

如綠烟相呼携筐去迢遞立遠阡梯空伐條枚葉上露未乾蠶饑當早歸秉心靜以專飭躬修婦事俛俛當盛年救忙多女伴笑語方喧然

物候

秀萋

原詩四月秀萋增傳不榮而實曰秀萋萋草也夏小正四月王萋秀萋其是乎物成自秀萋始

蜩螗鳴

原禮蜩螗鳴注蜩螗蛙也增釋文蜩螗蛙也即蝦蟆也淮南子注四月陰氣始動於下故

類應鳴也

蚯蚓出

原禮蚯蚓出增淮南子丘墳出注丘墳蠱蟻也

王瓜生

原禮王瓜生注王瓜葇挈也今月令云王萋生夏小正云王萋秀呂氏春秋王萋生淮南子注

王瓜色赤感
火之色而生

苦菜秀

原禮苦菜秀淮南子注苦菜味苦感火之味而
成易通卦驗苦菜葉似苦苣而細斷之有白汁

花黃似菊堪
食但苦耳

麥秋

原禮麥秋至集說秋者百穀成熟之期此於時雖
夏於麥則秋故云麥秋也增月令章句百穀各以

其初生為春熟為秋
故麥以孟夏為秋

御製見途中夏麥將熟志喜詩江潁淮壩道已周歸看東

省麥盈疇雨滋膏潤苗多秀早慶今年大有秋

增許敬
宗麥秋

賦考宿麥於生類起嚴秋於溽暑扇漸秀於梅風潤岐
苗於穀雨於時揚翹總暢陰呂潛生當隆曦之首節韞

秋令之初萌雜芸黃於綠野參肅殺於朱明始自天而下降終因地而斯成疇中氣爽壘墮際風清王安石隴麥詩荷葉初開笋漸抽東坡南蕩正堪遊無端隴上脩脩麥橫起風寒占作秋

草木長

原楚辭九章滔滔孟夏今草木莽莽注滔滔盛陽貌言孟夏四月純陽用事煦成萬物草木之

類莫不莽莽盛茂陶潛讀山海經詩孟夏草木長繞屋樹扶疎

鳴札

原夏小正鳴札傳札者寧縣也鳴而後知之故先鳴而後札增爾雅疏蝻一名蜻蜻如蟬而小方言

云蟬小者謂之麥蝻

圃有見杏

原夏小正圃有見杏傳圃者山之燕者也

鳴蜮

原夏小正鳴蜮傳屈造之屬

其樹桃

原淮南子四月其樹桃注桃後李熟

布穀

增淮南子孟夏之月以熟穀禾雄鳩長鳴為帝候歲注雄鳩蓋布穀也荆楚歲時記四月有鳥名獲

穀其名自呼農人候此鳥則犁耙上岸溫庭筠詩柳暗桑濃聞布穀

蔣麥枯

增董仲舒雨雹對建巳之月為純陽不容都無復陰也但是陽家用事陰氣之極耳蔣麥枯由

陰穀也

蠶耳絲

增春秋考異卹四月蠶耳絲

百穀權輿

增後漢書魯恭傳始夏百穀權輿陽氣胎養之時

南居李

原風土記南居李四月先熟

欽定四庫全書

御定月令輯要

枇杷

增風土記枇杷葉似栗子似藥四月熟廣志枇杷

冬花實黃大如雞子小者如杏味甜酢四月熟出

南安健為宜都唐太宗帖使至得所進枇杷子良深慰

悅嘉果珍味獨冠時新蘇軾枇杷詩綠暗初迎夏紅殘

不及春魏花非老

伴盧橘是鄉人

安石榴

增潘岳河陽庭前安石榴賦實有嘉木曰安石榴修條外暢榮幹內樛扶疎偃蹇冉冉弱紛柔於

是暮春告謝朱夏戒初新莖擢潤橐葉

垂腴曾華暄以先越含榮鵬其方敷

稷熟

增廣志破滅稷逼麥稷此二者以四月熟

木蓮花

增舊唐書白居易傳木蓮大者高四五丈巴民呼為黃心樹經冬不凋身如青楊有白文葉如

桂厚大無脊花如蓮香色艷膩皆同獨房藥有異四月初始開自開迄謝僅二十日

萬物布散

增周易集解風以散之荀爽曰謂建巳之月萬物上達布散田野

茄瓠

增東京夢華錄四月茄瓠初出上市東華門爭先供進一對可值三五十千者

時果

增東京夢華錄四月時果則御桃李子金杏林檎之類

麥門冬

增爾雅翼麥門冬生山谷肥地葉如韭四季不凋根有鬚作連珠形似穰麥類故名麥門冬四

月開花淡紅如紅蓼花實圓碧如珠原陶朱公書葉類莎草長秀根如麥類連珠種法四月初採子莢却根去

頭半寸許相去約一尺栽一顆入土一寸半實築四邊常以水澆有草即芸宜夏至前一日採取

荔枝

增異物志荔枝多汁味甘絕口又小酸可飽食不可使厭生時大如雞子其膚光澤乾則焦小四月

始熟荔枝譜火山本出廣南四月熟味甘酸而肉薄穗生梗如枇杷閩中近亦有之山在梧州嶺表錄異梧州

西有火山產荔枝四月子
丹以其地熱故曰火山

曹魚

增異物志鱠魚初夏從海中汧流而上長尺餘腹
下如刀肉中細骨如毛云是鱠鳥所化故腹內尚

有鳥腎二枚其鳥白色如鷺羣
飛至夏鳥藏魚出變化無疑

留鷺祭神

增圖經黎州通望縣每歲孟夏有白鷺鷺一
雙墜地古老傳云衆鳥避瘴臨去留一鷺祭

山神

仙人杖

增圖經本草陳子昂觀玉篇序余從喬公北征
夏四月次於張掖河洲草木無他異惟有仙人

杖往往叢生予昔嘗餌之戎人有薦佳
蔬者此物存焉因為喬公昌言其功

黃精

增圖經本草黃精葉如竹葉而短兩兩相對莖梗
柔脆頗似桃枝本黃末赤四月開細青白花如小

豆花狀子白如黍
根如嫩生薑黃色

栗花

增圖經本草栗四月開花
青黃色長條似胡桃花

瑞桐

增輿地紀勝泉州城初築時環郡皆植刺桐號桐
城初夏開花極鮮紅如葉先萌芽後發則其年

五穀

豐登故謂之瑞桐宋丁謂詩云聞得鄉人說刺桐
葉先花發卜年豐我今到此憂民切只愛青青不愛紅

棟花

增陸游幽居初夏詩楸花棟花照眼明幽人浴罷
葛衣輕又綠樹陰中紅棟起一團零亂濕臙脂

梧桐花

增本草衍義梧桐四月開嫩黃小花一
如棗花枝頭出綠墜地成油沾漬衣履

木半夏

增本草綱目木半夏樹葉花實及星斑氣味竝
與盧都同立夏後始熟故吳楚人呼為四月子

亦曰野

櫻桃

紫藤

增本草拾遺紫藤四月生紫
花可愛長安人亦種之庭也

木香

增草花譜花開四月木香之種有三其最紫心白
花香馥清潤高朵萬條望若香雪其清心白木香

黃木香皆
不及也

蠶鳥

增西吳枝乘四月有鳥飛其聲
曰著山看火湖民謂之蠶鳥

蠶蝦

增西吳枝乘四月有小蝦亦以蠶時
出市民謂之蠶蝦蠶熟則絕無矣

吳葵華

原神隱小滿初候吳葵華司馬光初夏詩四月
清和雨乍晴南山當戶轉分明更無柳絮因風

起惟有葵
花向日傾

麥秀寒

增田家雜占四月必作寒數日謂
之麥秀寒即月令麥秋至之候

莎蘿花

增一統志杭州府千頃山西有莎蘿花一株四月花開香開數里

箬蘭

增羣芳譜箬蘭葉似箬花紫形似蘭而無香四月開與石榴紅同時

木蘭

增羣芳譜木蘭葉似茵桂厚大無脊有三道縱紋皮似板桂有縱橫紋花似辛夷內白外紫四月初

開二十日即謝不結實

真珠蘭

增羣芳譜真珠蘭一名魚子蘭色紫蓓蘂如珠花開成穗其香甚濃四月內節邊斷二寸插之

即活以魚腥水澆之則茂

山丹

增羣芳譜山丹根似百合體小而瓣少莖亦短小葉狹長而尖頗似柳葉與百合迥別四月開紅花

六瓣亦結小子

欽定四庫全書

御定月令輯要

卷七

五

占驗

愆候

原禮孟夏行秋令則苦雨數來五穀不滋四鄙入保注申之氣乘之也又行冬令則草木蚤枯後乃

大水敗其城郭注亥之氣乘之也又行春令則蝗蟲為災暴風來格秀草不實注寅之氣乘之也

占秋糴

增齊民要術師曠占五穀貴賤法常以四月朔占秋糴風從南來西來者秋皆賤逆此者貴

立夏五行

增行軍月令立夏日得金五穀不成夏旱多風得木夏寒草生得火多妖言兵戈起得土

遠臣朝國無政令得水上下相和順天下安寧

立夏日暈

增紀歷撮要立夏日無暈無水有暈主做湖塘

魚散子

增紀歷撮要四月看魚散子占水黃梅時水邊草上看散子高低以卜水增止

雨損麥

原紀歷撮要四月夜雨損小麥諺云小麥不怕神共鬼只怕四月八夜雨農政全書立夏後夜

雨多主損麥蓋麥花夜吐雨多花損故麥粒浮秕也

十二日占

增紀歷撮要有利無利只看四月十二此日宜晴忌西南風吹足百錢動若東南風吹動

足百錢
十分好

卜歲

增談苑江南民於四月一日至四日卜一歲之豐凶云一日雨百泉枯言旱也二日雨傍山居言避

水也三日雨騎木驢言踏車取水亦旱也四日雨餘有餘言大熟也

初八日晴陰

原周益公日記四月初八烏漉禿不論上下一齊熟張鈞四月初八烏漉禿不論上下一齊熟

增通攷初八日看陰晴卜水旱最宜密雲不雨

欽定四庫全書

御定月令輯要

卷乙

五

日暖夜寒

增田家五行月內日裏要暖夜裏要涼主少水諺云日暖夜寒東海也乾

二十日占

原田家五行小分龍日即二十日晴分懶龍主旱雨分健龍主水東南上下大熱西北風

分白龍主大水東北風分青龍主小水

野薔薇

增田家五行野薔薇開在立夏前主水

魚骨曲

原田家雜占夏初食鯽魚脊骨有曲主水

水底苔

增田家雜占夏初水底生苔主有暴水諺云水底起青苔卒逢暴水來

虹見

原農政全書月內虹見主米貴

朔晦占

原文林廣記四月朔風雨麥惡米貴晦朔大雨大蝗蟲灾通攷朔日值立夏主地動值小滿主

凶災大風雨主大水小則小水晴主旱又曰此日雨主有重種兩禾之患

立夏日風

原通攷立夏日風東來雷電多南來年豐歲安西來人衆不安北來泉涌地動

十四日占

原通攷十四日晴主歲稔黃昏時日月對照主夏秋旱

十六日占

原通攷十六日看月卜水早上早無雲紅色主大旱遲而白色主水夜深主大水有雲主

草多雲黑主有蟹諺云有穀無穀但看四月十六又云月上早低田收好稻月上遲高田剩者稀增嘉定縣志四月十六日望晴雨以候歲是日晴則水大雨則旱惟陰雲為佳夜忌陰黑諺云此夜烏瀉禿西鄉村子繞田哭言有水也

量月影

原通攷十六夜月當午立一丈竿量月影若過竿主雨水多沒田夏旱人饑長九尺主三時雨

欽定四庫全書

卷九

水八尺主六月雨水七尺主低田大熟高田半收五尺夏旱四尺主蝗三尺主人饑

雜紀

龍見

增漢書宣帝紀甘露元年夏四月黃龍見新豐書武帝紀泰始六年四月白龍二見於東莞

鳳凰集

增漢書宣帝紀地節二年夏四月鳳凰集魯郡羣鳥從之

續弦膠

增十洲記鳳麟洲煮鳳喙及麟角合煎作膏名之為續弦膠或名連金泥能續弓弩已斷之弦

刀劍斷折之金更以膠連續之使力士掣之他處乃斷所續之際終無斷也武帝天漢三年四月西國王使至獻此膠四兩武帝幸華林園射虎而弩弦斷使者時從駕又上膠一分使口濡以續弩弦帝曰異物也乃使武士數人共對掣引之終日不脫如未續時也膠色青如碧玉

吉光裘

增十洲記武帝天漢三年四月西國王使至獻吉光毛裘裘黃色蓋神馬之類也入水數日不

沉入火不焦

就草

增漢書趙充國傳四月草生發郡騎及屬國胡騎伉健各千倅馬什二就草

關陽門

增李尤關陽門銘關陽在孟位月惟已清明冠節太陽進起

紫蘭宮玉女

增漢武內傳元封元年四月戊辰帝閒居承華殿東方朔董仲舒在側忽見一女子

著青衣美麗非常帝愕然問之女對曰吾墉宮玉女王子登也向為王母所使從崑崙山來帝問東方朔曰是

西王母紫蘭宮玉女昔出配北燭仙人近又召還使領命祿真靈官也

得玉璽

增晉書禮志魏太和元年四月洛邑初營宗廟掘地得玉璽方一寸九分其文曰天子義思慈

欽定四庫全書

禮部戶部
卷九

親明帝為之改
容以太牢告廟

白麟見

增晉書武帝紀太康元年
夏四月白麟見於頓丘

丹鵲扇

增拾遺記周昭王二十四年塗脩國獻青鳳丹
鵲各一雌一雄孟夏之時鳳鵲皆脫易毛羽聚

鵲翅以為扇緝鳳羽以飾車蓋扇一名遊飄二名條翻
三名虧光四名仄影時東甌獻二女一名延娟二名延

娛使二人更搖此扇侍於
王側輕風四散泠然自涼

射雉

增潘岳射雉賦於時青陽告謝朱明肇授靡木不
滋無草不茂初莖蔚其曜新陳柯槭以改舊天決

決以垂雲泉涓涓而吐溜麥漸漸以擢芒
雉鷺鷥而朝雉注夏為朱明時四月也

河濟清

增南史宋文帝紀元嘉二
十四年四月河濟俱清

祠天

增宋書索頭傳其俗以四月祠天

鵝尾紫烟

增陳書高祖紀永定二年四月戊辰重雲殿東鵝尾有紫烟屬天

獻瑞鐘

增南史陳宣帝紀太建七年四月壬子郢州獻瑞鐘六

獲玉印

增魏書靈徵志高宗和平三年四月河內人張超於壞樓所城北故佛圖處獲玉印以獻印方

二寸其文曰富樂日昌永保無疆福祿日臻長享萬年玉色光潤模制精巧百寮咸曰神明所授非人為也詔

天下大酺三日

異雀

增後燕錄長樂元年夏四月甲午有異雀素身綠首集於端門樓翔東園二旬而去

隆慶池泛舟

增舊唐書中宗紀景龍四年四月乙未幸隆慶池結絲為樓宴侍臣泛舟戲樂

宴親屬

增唐會要高祖武德七年四月丙午宴王公親屬於文明殿見安平王太妃以尊屬從家人禮

降階再拜酒小闌徙坐翠華殿帝

賦詩王公遞上壽賜帛各有差

玉華宮銘

增唐會要貞觀二十二年四月太宗御製玉華宮銘令皇太子已下並和

慈烏巢拱

增實錄開元二十八年四月庚辰有慈烏巢紫宸之拱

龍堂禱雨

增唐會要貞元十三年四月辛興慶宮龍堂禱雨有一白鷗鵲浮沉水際羣類翼從左右

以為龍之變化既而大雨

宴花萼樓

增唐明皇帝首夏花萼樓觀羣臣宴寧王山亭回樓下又申之以賞樂賦詩并序今年帶

閏節候全晚暑氣猶清芳草未歇披樂善之邸坐忘憂之觀東郊跼步南山在目足以締夏首之新賞補春餘

之墜歡朕登覽上官俯臨長陌暢衆心之怡虞懼歸騎
之逶迤鼓之以琴瑟侑之以筐篚衛尊意洽場藿思苗
賦我有嘉賓之詩奏君臣相悅之樂踟躕西日吟玩乘
風不知衷情之發於翰墨也詩今年通閏月入夏展春
輝樓下風光晚城隅宴賞歸九歌揚政要六舞散朝衣
天喜時相合人和事不違禮中推意厚樂處感心微別
賞陽臺樂前
句暮雨飛

進銅鼓

增玉海乾德四年四月辛亥南蠻進銅鼓以請
內附又景德元年四月癸酉象州貢銅鼓高一

尺八寸濶二尺五寸旁有四耳
銜環鏤人騎花蛤椎之有聲

淳化法帖

增玉海淳化四年四月詔以先賢墨迹為
法帖十卷勒於石丙戌賜近臣各一部

獻總仙記

增玉海至道二年四月知黃州樂史獻總仙
記百三十七卷目錄四卷帝宣示宰臣付史

館

宸章集

增玉海祥符三年四月丁巳龍圖待制陳彭年奉詔纂歷代帝王集凡正統十五卷閏位十卷

上作序賜名宸

章集詔褒彭年

槐杏連理

增玉海祥符五年四月甲辰瑞聖園槐杏連理繪圖以示輔臣

百寶酒船

增玉海元豐二年四月癸卯太皇太后幸金明池上扶太皇太后登輦又豫為百寶酒船

於是持
以上壽

撤金蓮燭

增玉海元祐三年四月蘇軾草三制對小殿撤金蓮燭送歸院

校四庫書

增玉海紹興二年詔平江守臣訪求圖籍四月詔分經史子集四庫分官日校

送刀魚

增莫州岡經郝姑祠在莫州莫縣俗傳郝姑得為水仙每至四月送刀魚為信至今四月內多

有刀魚上來鄉人每到四月祈禱

玉盤盂

增蘇軾玉盤盂詩序東武舊俗每歲四月大會於南禪資福兩寺以芍藥供佛而今歲最盛凡

七千餘朵皆重跗累萼繁麗豐碩中有白花正圓如覆盂其下十餘葉稍大承之如盤姿格絕異獨出於七千朵之上而其名理甚乃為易之詩雜花狼籍占春餘芍藥開時掃地無兩寺粧成寶瓔珞一枝爭看玉盤盂佳名會作新翻曲絕品難尋舊畫圖從此定知年穀熟姑山親見雪肌膚從

酒庫開煮

原乾淳歲時紀戶部點檢所十三酒庫例於四月初開煮九月初開清先是提領所呈樣

品嘗然後迎引至諸所隸官府而散每庫各用疋布書庫名高品以長竿懸之謂之布牌以木牀鐵槩為仙佛

欽定四庫全書

御定月令輯要

卷九

五

鬼神之類駕空飛動謂之臺閣雜劇百戲諸藝各庫爭為新好庫妓之瑒瑒者皆珠翠盛飾銷金紅背乘繡鞵寶勒駿騎少年狎客往往簇釘持盃爭勸馬首所經之地高樓邃閣繡幕如雲累足駢肩真所謂萬人海也

清風樓

增東京夢華錄四月在京七十二戶諸正店初賣煮酒市井一新惟州南清風樓最宜夏飲初

嘗青杏乍薦櫻桃時得嘉賓觥酌交作

江船下水

增岳陽風土記岳州瀕江諸廟皆有船四月中擇日下水擊畫鼓集人歌以權之至端午

罷

五花圖

增輿地紀勝高郵豐瑞堂以芍藥得名淳熙三年夏四月郡圃芍藥一枝五色時郡守王調名

其燕寢之堂為豐瑞仍作五花圖於上

科柏

增研比雜志宋翠洛陵寢歲以四月科栢前期遣官奏告

瓜熟

增續文獻通考隋朱昌寧永城人有孝行母病思瓜時方四月瓜未熟昌寧號哭於瓜田中一夕瓜

盡熟母食之即差

田雀肥

增小丹丘客談京師田雀以四月肥背有黃羽與江鄉純色者別而以江南食法製之亦甚肥

美

楓樹異花

增名勝志文山在龍溪縣城東二十里北臨大溪三面通湖弘治十七年四月山有大楓

樹上產異花一簇其狀如蘭其葉如桂有殊香凡四十日方謝

玉堂賞花

增雙槐歲抄文淵閣芍藥舊嘗有花自景泰增植後未嘗一開天順改元徐有貞許彬薛

欽定四庫全書



御定月令輯要

卷七

五十六

瑄李賢同時入為學士居中一本遂開四花其一久而
不落既而三人皆去惟賢獨留明年各萌芽左二右三
中則甚多而彭時呂原林文劉定之李紹倪謙黃諫錢
溥相繼同升學士凡八人賢約開時共賞夏四月盛開
八花遂設宴以賞之賢賦詩十章閣
院官際咸和彙成曰玉堂賞花詩集

晉四月折楊柳歌

增芙蓉始懷蓮何處覺同心俱生世
尊前折楊柳拾香散名花志得長相

李賀四月樂詞

增曉涼暮涼樹如蓋千山濃綠生雲外
依微香雨青氛氲膩葉蟠花照曲門金

塘開水搖碧漪老景沈重
無驚飛墮紅殘萼暗參差

御定月令輯要卷九